

**NATIONAL ASSEMBLY OF
SEYCHELLES**

Tuesday 22nd October 2024

The Assembly met at 0901 am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour tou *staff* ki pe akonpany nou e nou piblik deor ki swiv nou fidelman. Mersi. E bonzour e byenveni nou bann viziter ki dan Galeri, bann etidyan Lekol Port Glaud.

Mon swet zot en bon letan dan Lasanble pour partaz travay avek nou. Mersi. Avan nou al lo *Order Paper*, zis enn pti mesaz ; mon pa ti la dan Lasanble semenn pase pour mesaz bann madanm lo *breast cancer*.

Me selman vi ki lokazyon pa ankor pase aköz i *Breast Cancer Month*, mon ava azout mon apresyasyon pour zot mesaz e osi pour zot langazman dan sa size tre enportan pour lasante.

E mon konn – mon apresye osi zot lenplikasyon dan bann domenn lasante pli larz. Menm plis ki *breast cancer*. Mersi e solidarite.

Mon osi pran loportinite pour eksprim apresyasyon e rekonnet travay Servis Tenny Dife e Sovtaz. E sirtou pour zot aksyon dan sa detrwa dernyen zour pour tenny sa dife ki pre avek nou lo zone 14 Perseverance.

Mon krwar nou rekonnet ki zot in fer en travay efikas. Aköz sa ti en moman ase menasan pour nou lenfrastruktir e osi pour lasante pour lavi dimoun.

Donk, nou apresye zot servis. E nou swet zot bon kouraz pour kontinyen. Mersi avek sa nou ava al lo Prezantasyon Papye, Madanm Clerk.

MADAM CLERK

Mersi Mr Speaker. Bonzour Mr Speaker. Bonzour tou bann Manm tou dimoun a lekout, bann *staff* Lasanble osi. Bann Papye ki pe ganny prezante bomaten i:-

S.I. 78 of 2024 Misuse of Drugs (Appointment of Forensic Analyst) Regulations, 2024

S.I. 79 of 2024 Utilities Regulatory Commission Act, 2023 (Commencement) Notice, 2024

S.I. 80 of 2024 Electricity Act, (Commencement) Notice, 2024

S.I. 81 of 2024 Mutual Assistance in Criminal Matters (Designation of Approved

Requesting Authority) Notice, 2024

The Finance and Public Accounts Committee – Report on the Management of Assets of the National Bureau of Statistics, July 2024

The Finance and Public Accounts Committee - Report on the Findings of the Auditor General’s 2021 Report Public Hearings of 2023. Mersi Mr Speaker.

MR SPEAKER

Mersi Madanm Clerk. Mon war de rapor Lasanble la, eski FPAC pour adres sa? Ou le laparol Onorab Pillay?

HON SEBASTIEN PILLAY

Wi. Mersi Mr Speaker. Bonzour e bonzour tou dimoun ki pe swiv nou bonzour tou koleg Onorab. E bonzour bann etidyan lekol Port Glaud ki dan Galeri.

Efektivman Mr Speaker, i annan de rapor ki pe ganny table pour - *in regard to* travay FPAC.

Premye rapor mannyer in raporte lo nou *Order Paper*. I en rapor lo *Management of Assets* kot Biro Statistik. Mon le fer remarke ki dan tou bann *hearings* ki nou'n fer, nou'n apre sa komans swiv bann antite pli pre.

E komans regard *within* sa bann antite. Ki mannyer zot pe met an plas bann striktir

pour dil avek bann *anomaly*, oubyen bann konsern ki'n ganny trouve dan Rapor Oditer Zeneral.

Biro Statistik i enn bann landrwa ki nou'n vizite ki nou'n travay avek zot. E ki nou'n travay lo en rapor, pour demontre ki mannyer sityasyon i ete kot Biro Statistik, ki i a kapab ganny met lo *website* Lasanble pour benefis bann manm piblik ki le swiv kwa ki dan sa rapor. E osi i annan bann lezot dokiman an relasyon ek sa rapor.

An sa ki konsern rapor lo *findings* Rapor Oditer Zeneral 2021, Parey nou rapel ek sityasyon *COVID*, nou ti bezwen *move* sa *public hearing* en pe pli lwen.

Sa rapor i en rapor ase konsiderab e ase gran. Annefe nou'n fer plizyer *follow up* avek bann antite pour demontre bann diferan *anomaly* ki annan.

Nou bezwen note Mr Speaker ki enn bann keksoz ki kontinyelman monte, se i annan en mank aderans avek bann prosedir ki'n ganny etablir an sa ki konsern *procurement* oubyen depans larzan piblik. Sa rapor i detay sa. Dan prezantasyon nou lot rapor nou pour donn en sinopsis pli larz lo ki sa rapor pe dir nou. E ki bann keksoz ki nou pe propoze ki Gouvernman i fer zisteman

pour kapab dil ek sa sityasyon.

Kot bann antite i bezwen *comply* avek bann regilasyon finansyel, ler zot pe fer zot bann depans oubyen bann akizisyon. I osi annan en konsern mazer lo lafason ki bann antite i *maintained* sa ki nou apel bann *fixed assets register* oubyen zot *assets register*.

Nou pe remarke ki malgre ki Gouvernman i depans plizyer larzan dan *procure* plizyer diferan *assets*, i annan en konsern lo lafason ki sa i ganny kataloge ek sa i ganny met lo rikord.

Sa legzanp ki nou'n war avek Biro Statistik annefe, i enn bann rezon akoz nou ti fer sa, si oule sa *snapshot* lo Biro Statistik pour nou war ki zot in met an plas.

E mon kapab dir ki apre travay ki zot in fer avek nou, i annan en striktir ki zot in met an plas an deor sa ki deza egziste avek *DICT* pour zot kapab *maintained* e *monitor* zot bann *fixed assets*.

Mon le note ki nou'n fer menm analiz an se ki konsern, en vizit resan ki nou ti fer kot *Air Seychelles*. Zisteman pour vwar lakantite larzan ki ganny depanse dan sa bann *assets* i koute ler ou azout zot *over time*.

Alors Mr Speaker avek sa mon le prezant sa de rapor avek Lasanble. Mersi.

MR SPEAKER

Mersi Onorab. E mersi pour travay Komite *FPAC Finance and Public Accounts Committee* dan Lasanble, ki en Komite tre enportan pour Lasanble. *Next* Madanm Clerk nou annan en *First Reading Public Bill*.

MADAM CLERK

Mersi Mr Speaker. *First Reading* pour lir *Appropriation Bill, 2025*. Savedir pour *Second Reading of* pour ki Minis i vin fer *the Budget Speech*.

This Act may be cited as the Appropriation Act, 2025.
Mersi Mr Speaker.

MR SPEAKER

Mersi. Madanm Clerk nou ava avans lo *Private Notice Question*. Madanm Hansard raporter ou ava apel Minis e zofisye ki la.

Bonzour Minis pour Later e Lozman Minis Billy Rangasamy. Bonzour Minis pour Lagrikiltir Sanzman Klima e Lanvironnman Mr Flavien Joubert. Bonzour Mr Cyrille Bonnelame *Chairman Planning Authority*, Mr Denis Matatiken *Principal Secretary* pour Lanvironnman.

E byenveni zot tou dan Lasanble pour partisip avek

nou dan *Private Notice Question*. Avek sa mon a donn laparol Onorab Sebastien Pillay *Leader* Lopozisyon, pour soumet son *Private Notice Question*.

HON SEBASTIEN PILLAY

Mersi Mr Speaker. Bonzour. Mr Speaker avan mon komanse mon le met lo rikord. E mon le met devan piblik Seselwa ki sa kestyon in ganny amande par ou menm ou, apre ki ou'n fer, ou'n servi ou prerogativ anba *Standing Order* mon pa pe al dan plis detay. Mon pa ganny permet pour fer sa.

Me mon zis met lo rikord ki i annan lamannman ki'n ganny fer ek sa kestyon ki i vin dan sa fason. E kestyon ki ou ou'n amande Mr Speaker i lir koumsa:-

An relasyon avek sa proze lo Assumption:

1. Eski Gouvernman i kapab imedyatman fer vin piblik tou bann dokiman relye avek sa proze?

Son dezyenm parti:-

2. Eski Gouvernman in konsilte *SIF* avan sa proze i komanse e si non, aköz?

E lefe ki mon war en *panel* la, *hopefully* nou kapab ganny larepons i kapab eklersi keksoz. *Hopefully* Mr Speaker.

MR SPEAKER

Mersi Onorab. Silvouple gard lord. Ou'n demann ou kestyon se tou.

Minis, mon ava envit zot pour donn premye repons. Likel ki pour demare? Minis Rangasamy ou annan laparol.

MINISTER

BILLY

RANGASAMY

Bonzour Mr Speaker. Bonzour tou Manm Lasanble, tou Manm a lekout bann travayer eksetera, bann ki pe swiv lo televizyon, *internet* eksetera; tou bann *staff*.

Avan mon demare mon parey mon labitid, mon pour demann lagras Bondye pour nou kapab fer en bon deliberasyon bomaten. Travay a ganny fer dan en fason drwat, onnet e kler. Mersi Mr Speaker.

Les mon konmanse pour konfirmen Mr Speaker, ki tou prosisis apropiye in ganny swiv pour proze *eco* touristik lotel lo nou zil Assumption dan en fason transparan. Tou bann dokiman ofisyel i an plas.

MR SPEAKER

Minis. Minis. Atann mwan enn pti moman. Mon pour redemann ou pour rekomanse aköz mon ankor pe pran non tou dimoun ki'n lev lanmen e i pe okip mwan enn pti gin. Mon ti a kontan fini. Silvouple gard lanmen anler ankor aköz mon

pa ankor fini. Tre byen Minis mon a redemann ou – ki *point of order* Onorab Pillay?

HON SEBASTIEN PILLAY

Anba *Order* 8 Mr Speaker. Lasanble napa okenn lezot travay apard *Question Time* ozordi. E mon'n vwar pa plis ki preski trwa kar Lasanble in lev lanmen pour sa *PNQ*.

Eski ou pour les nou demann kestyon plis ki sa lerdtan ki ou pour donn mwan la. La in ariv mon krwar forse 30 ekek minit ki ou pour donn mwan, akoz sa i en size enportan. Oubyen eski ou pour fer mwan parey labitid 10 er apre tou dimoun i ava ale. E ou kote i ava – (wi gat letan Lasanble pour nou pa konn)-

(comments off-mic)

MR SPEAKER

Onorab. Ou'n fer en *point of order* in akseptab. I pa ti neser ki ou fer bann komantr ki pa apropiye avek. E mon pour zis reponn ou *point of order*. Mon pran - Lefe ki ou kestyon i ou dir i pli enportan, i pa pli enportan ki nenport lot kestyon.

Sa pa konsern mwan, sel konsiderasyon, sel konsiderasyon ki mon a pran, se ki i annan en kantite Manm ki'n lev lanmen. Sa wi, i en konsiderasyon ki mon a pran kont.

E mon a deside keler kestyon i a fini. Mersi bokou. Minis mon bezwen demann ou prezan pour rekomans ou repons e nou a kapab swiv ou atantivman. Mersi.

MINISTER BILLY RANGASAMY

Mersi bokou Mr Speaker. Wi ankor enn fwa bonzour zot tou. Les mwan komanse pour konfirman ki tou prosesis apropiye in ganny swiv pour proze *eco* touristik sa lotel, lo zil Assumption.

Dan en fason transparan, tou bann dokiman ofisyel i an plas. Les mwan fer resorti, ki serten sa bann dokiman i deza dan domenn piblik. Pour lezot dokiman i annan serten sinifikasyon konfidansyalite e prive i annan prosesis pour swiv anba akse pour lenformasyon. Onorab i kapab fer sa an ekrir an swivan bann prosedir an plas, si i anvi ganny sa bann dokiman.

Mr Speaker, les mwan eksplik sa bann prosesis an plas e ki ganny swiv an detay. Mon a donn enn pti leklersisman lo ki mannyer Onorab i kapab fer sa demars e ganny akse ek sa bann dokiman.

Pour sak letap, mon pour eksplike kot sa dokiman i ete. En fason ki ou a kapab fer le neser oubyen ou a kapab

konnen kote ou pour ganny akse avek sa bann lenformasyon.

Le 3 Zen 2023 Mr Speaker *IDC* ti lans en lapel pour lekspresyon lentere pour devlopman en proze *eco* touristik *resort* en lotel. Ki ti osi ofer en *gateway* pour sa sit leritaz *UNESCO* Aldabra.

Sa ti ganny pibliye lo bann zournal tel ki Nasyon. Alors i deza dan domenn piblik. En *outline planning application*, ti ganny soumet kot Lotorite Plan le 6 Desanm 2023. E ti ganny aprouvasyon an prensip par Lotorite Plan le 23 Zanvye 2024.

Me avek kondisyon ki sa devloper i bezwen prepar e swiv prosesis *EIA* - savelir (*Environment Impact Assessment*). Sa *outline planning application* i reste en dokiman prive ant sa devloper e Lotorite Plan. Parske i annan a sa staz i annan en konotasyon konfidansyalite e komersyal.

Me prosesis aplikasyon formel pour ganny akse avek sa lenformasyon, i bezwen ganny swiv kot Lotorite Plan. Anvi ki sa devloper i en etranze in bezwen swiv en laplikasyon en prosesis sanksyon.

E sa ti ganny fer e aprouve par Konsey Minis le 20 Mars 2024. Aplikasyon ti ganny soumet le 12 Zanvye 2024. Let aprouvasyon

sanksyon ti sorti le 27 Mars 2024 par Minister Later ek Lakaz. Parey tou lezot proze lo sa lanpler e ki ganny soumet par en etranze.

Sa prosesis e osi son bann dokimantasyon, i reste dokimantasyon prive konfidansyel e ankor enn fwa i annan prosesis pour ou kapab ganny akse ek sa lenformasyon.

EIA ti ganny fer baze lo rekomandasyon *outline planning application*. Plizyer konsiltasyon avek bann *stakeholders* apropiye ti ganny fer.

E Minis pour Lanvironnman byento i a donn enn pti pe plis detay lo sa prosesis *EIA*, zis apre ki mon'n fini partaz mon larepons. Lo prosesis e dokiman ki an plas an zeneral i annan serten formalite ki an plas, me pour sa dokiman *EIA Report* i deza dan domenn piblik.

Dokiman *lease* parey nou apel sa *pass by* Zil Assumption ant Gouvernman Sesel avek *IDC*. E osi *sub lease* ant *IDC* ek sa lakonpanyen, investiser, devloper i deza dan domenn piblik kot Biro Lanrezistreman Later.

Mr Speaker, mon konpran osi byento *CEO* i a kapab donn plis detay lo la. Ki laplikasyon detaye in komans ganny soumet kot Lotorite

Plan parey nou apel sa Angle, *detailed planning application*.

E an se moman sa prosis in demare. E Lotorite Plan pe analiz sa aplikasyon. Mr Speaker, si en dimoun oubyen en lorganizasyon i le ganny akse avek sa bann dokiman i kapab swiv prosedir pour ganny akse avek sa bann tel dokiman. E sa i kapab fer li atraver Lotorite Plan.

Mon le asir tou dimoun ki sa proze pe swiv tou prosis apropiye ki an plas e osi tou i dan latransparans. Par egzanp, medya menm ti osi ganny envite lo zil Assumption pour pli byen konpran sa proze detrwa mwan pase.

Lotorite Plan in osi resaman vizit Zil Assumption pour zot ganny en pli bon apersi lo zeografi sa zil e son teren. La tou bann Manm Lotorite i dan en pli bon pozisyon pour pratikman e realistikman analiz e fer bann bon diskisyon deliberasyon transparan lo sa laplikasyon detaye, e pour sa poze *eco-touristik* lo zil Assumption. Zot annan en pli bon apresyasyon sa landrwa. Alors zot dan en pli bon pozisyon pour zot fer komantr apropiye.

An konklizyon Mr Speaker, mon konfirman koman Minis ki responsab Lotorite Plan, ki mon satisfè ki tou prosedir *planning* i

sanksyon ki an plas pour en tel devlopman in ganny in ganny swiv.

Mon'n osi eksplike ki sa bann dokiman ofisyel i annan prosedir pour nou kapab ganny akse avek zot si zot pa al dan domenn piblik. Sa i fasil sa i en prosedir ki tou dimoun i kapab swiv.

Napa nanryen ki'n ganny fer an kasyet lo sa proze Mr Speaker. I enportan ki pep Seselwa i konpran sa. Avek ou permisyon Mr Speaker, mon a prezan envit mon koleg Minis ki responsab pour Lanvironnman pour eksplik prosedir *EIA* eksetera, e osi kouvert an plis detay dezyenm parti kekyon. Mersi Mr Speaker.

MR SPEAKER

Eskize. Minis Joubert, ou a pran laparol.

MINISTER FLAVIEN JOUBERT

Ok Mr Speaker. Mersi Mr Speaker. Bonzour Mr Speaker. Bonzour bann Manm Lasanble Nasyonal ek bann dimoun ki pe ekoute ozordi bomaten.

Mr Speaker, kekyon, premye parti kekyon i demande si nou kapab fer vin piblik tou dokiman ki relye avek sa proze. Tou dokiman ki merit piblik pour sa ki konsern sa proze i deza dan la porte piblik.

Sa prosesis *EIA* in ganny fer dan en fason piblik. E sa bann dokiman i swa *online* ouswa i ganny trouve kot Departman Lanvironnman. Mr Speaker, zis pour eksplik enn pti pe prosedir ki'n ganny fer pour letid lenpak pour sa proze.

Prosedir letid lenpak lanvironnman ti komanse le 8 Zanvyé 2024, ler nou ti resevwar let lapwentman *ICS* koman konsiltan pour sa proze a sa staz parey pour lezot proze.

Departman ti fer en *meeting* ki apel en *inception meeting* le 26 Zanvyé avek konsiltan. E en reprezantan devloper pour prezant zot, pour prezant son proze e pour departman enform zot lo bann prosedir.

Apré sa ti annan *scoping meeting* avek bann Lotorite Gouvernman le 5 Zanvyé kot reprezantan *SIF* ti prezan. Ti osi annan en dezyenm *meeting* le 26 Zanvyé avek reprezantan lezot lorganizasyon parey *SeyCCAT*, parey sa *unit* ki pe travay lo *marine spatial plan*. E lezot lorganizasyon ki annan en lyen avek sa proze ouswa en lentere dan sa proze.

E osi vi ki zot pa ti prezan pour premye *meeting*. En *scoping visit* ti ganny fer lo zil Assumption le 6 Fevriyé sa lannen. Prezan pour sa vizit ti Lotorite Plan, Lotorite Lasante

Piblik, Departman Dezas ek Risk, Departman Sanzman Klima, Departman Lanvironnman, *SFRSA* e osi reprezantan *SIF* ki ti ganny reprezante par lekip Aldabra.

E sa ti enkli Aldabra *Island manager*, *Island scientific coordinator*, e osi kordinater *tourism*. Gouvernman ti organiz en rankont piblik pour sa proze le 9 Mars sa lannen kot Sant Kominoter Roche Caiman.

Manm piblik reprezantan diferan lorganizasyon ensi ki reprezantan *SIF* ti prezan. Parey prosedir i demande, tou dimoun enkli bann Manm piblik ti kapab donn zot komanter lo sa proze. E zot ti fer sa par konplet en dokiman ki apel en *scoping form*. Tou bann pwen enportan kolekte atraver *scoping* ti ganny servi dan preparasyon *Terms of Reference* ki ti ganny donner avek sa konsiltan le 17 Avril.

ICS ti pran apepre 4 semenn pour prepar rapor *EIA*, ki ti ganny soumet avek departman le 15 Me. E ler konsiltan ti soumet son rapor kot Minister, bann zofisye ti war ki i annan lenformasyon ki ti manke. E serten keksoz pour adrese tel ki format sa rapor, eksetera.

Departman ti fer *ICS* adres sa bann konsern e *ICS* ti soumet rapor amande avek Minister le 28 Zen. E apre sa,

rapor ti ganny met lo lenspeksyon piblik ant le 3 Zilyet ek le 27 - le 22 Zilyet sa lannen.

Anvi ki biosekirite ti pli gran konsern, nou ti santi ki sa pa ti byen ganny adrese dan sa rapor. Alor konsiltan i devloper ti ganny demande ki en eksper i fer sa plan. En plan biosekirite pour adres tou bann konsern ant Aldabra ek Assumption.

SIF ti donn en lalis eksper e enn ti ganny apwente pour konplet sa plan. Sa plan ti osi ganny partaze avek *SIF*, pour son komanter avan ki laprouvasyon ti ganny donner.

SIF ti donn zot komanter lo la e Minister in fer sir ki zot bann konsern e kondisyon i ganny enkli dan lotorizasyon ki'n ganny donner avek sa devloper le 3 Septanm.

Zis pour repet menm pwen Mr Speaker, rapor letid lenpak i deza lo a laporte piblik lo *website* Lanvironnman. E okenn dimoun ki anvii kopi osi i kapab kontakte Departman Lanvironnman.

Lezot dokiman asosye avek proze i piblik e i kapab ganny akse atraver prosedir Akse pour Lenformasyon anba Lalwa 2018. Mersi Mr Speaker.

Mr Speaker lo dezyenm parti keston.

Eski Gouvernman in konsilte *SIF* avan sa proze i komanse e si non, akoz? Mr Speaker, *SIF* in ganny konsilte dan diferan staz sa proze.

MR SPEAKER

Minis. Minis terminen silvouple. Termin ou repons.

MINISTER FLAVIEN JOUBERT

Prenon kont ki sa proze pe ganny fer lo en zil ki pros avek atoll Aldabra, e *SIF* i sa lorganizasyon ki responsab pour zeyon sa zil.

Premye konsiltasyon avek *SIF* e lezot Lotorite konsernen ti ganny fer le 5 Fevriye pour *scoping*. Pandan sa *meeting* konsiltan ti prezant konsep e tou bann dimoun ki ti prezan ti kapab ganny loportinite pour met zot konsern devan.

Reprezantan *SIF*, *Aldabra Island manager* parey mon'n nonmen ti osi prezan pour *scoping* vizit ki ti fer lo zil Assumption ansanm avek bann Lotorite konsernen le 6 Fevriye.

Le 9 Mars *SIF* ti osi prezan dan *meeting* pour piblik ki ti fer kot Sant Kominoter Roche Caiman.

Departman in osi konsilte *SIF* ler premye versyon sa rapor ti'n ganny soumet ek departman. Sa bann konsern ti apre ganny

diskite avek konsiltan pour amelyor sa rapor.

SIF ti osi rekomann en plan biosekirite pli detaye, an relasyon avek bann faz. Bann diferan faz sa devlopman pour asir sa i ti menm rekomann lalis eksper pour fer sa travay.

Versyon amande sa rapor ti ganny sirkile kot *SIF* pour komanter. Zot ti demann en ekstansyon letan pour zot donn zot komanter ki departman ti donner.

Savedir olye le 22 Zilyet, *SIF* ti demande pour li soumet son komanter le 31 Zilyet. Ler Minister ti resevwar sa plan biosekirite ti osi konsilte *SIF* e Minister ti osi pran bann pwen pertinan ki *SIF* ti'n met devan, pour enkli dan bann kondisyon *Notice of acceptance* ki ti ganny donner le 3 Septanm. Mersi Mr Speaker.

MR SPEAKER

Mersi Minis. Mon le fer en remark pour Onorab Pillay.

Onorab Pillay, detrwa fwa letan Minis ti pe koze ou'n pran laparol *off-mic* e ou'n enteronp mwan, ou'n enteronp mon krwar Lasanble.

Mon pe dir ou mon pa pour aksepte sa e si ou kontinyen fer sa mon pour demann ou pour kit lasal e ou a remarke ki sa pour vedir ki ou pa ganny ou siplemanter.

Mon demann tou Manm pour ki sa sesyon i reste

annord. Lo kestyon letan, mon pour prolonz en pe sa sesyon kestyon. Nou pour pran siplemanter bann lezot Manm ziskan 10 er 15 apepre. Pour vi ki kestyon i reste annord.

Apré 10 er 15 mon a pran kestyon siplemanter *Leader* Lopozisyon. E nou a termin 10 er edmi avek sa kestyon. Bon, mon annan en kantite Manm ki'n lev lanmen. Mon pa pe garanti ki tou Manm pour ganny sans demann kestyon i depan lo letan.

An menm tan mon a fer lapel ek bann Minis ek bann zofisye pour gard zot repons direk, konkret lo kestyon ki demande, pour nou permet otan Manm poz zot kestyon silvouple.

Premye kestyon ki mon a pran i Onorab Henrie.

HON GERVAIS HENRIE

Mersi Mr Speaker. Bonzour tou dimoun. Premye kestyon ki mon ti ava kontan demann *panel*, anvi ki mon pa'n tann zot fer sa resorti dan zot larepons si zot kapab donn nou detay lo bann benefis finansyel e non-monnetter ki Sesel pour benefisye avek direktteman atraver sa proze.

E dezyenmman prenon kont grander zil Assumption...

MR SPEAKER

Onorab, mon bezwen fer en keksoz kler. Sa kestyon ki'n

ganny mete, i lo akse avek lenformasyon. Dokiman pour met dan piblik. I pa lo proze Assumption dan son bann detay.

Nou pa pour ganny letan dan sesyon al lo bann detay dan sa proze. So Onorab mon pe endik ou, si ou kapab annan en kestyon lo lenformasyon e langazman avek *SIF* baze lo kestyon orizinal, mon ava aksepte sa kestyon.

HON GERVAIS HENRIE

Mersi Mr Speaker pour sa direktiv. Donk, mon a sey *frame* mon dezyenm kestyon dan sa laliny. Baze lo bann konsiltasyon ki *SIF* in kapab fer ouswa rekomandasyon, Kekfwa lo grander sa proze an konparezon ek grander sa zil.

Lenformasyon ki mon'n antann dan medya, sa devlopman i pran apepre 1poursan zil Assumption. Me ler nou pour konpar li avek lakantite devlopman ki annan lo La Digue ki pli ptipti ki Assumption, ki osi annan en lot gran lotel parey *L'Orangerie*.

Ouswa ler nou pour get devlopman ki'n arive lo Ile Platte ki ti komans an 2017 anba *previous administration*, ki mannyer nou kapab konpare avek lenpak lo lanvironnman? Mersi bokou.

MR SPEAKER

Mersi. Minis.

(comment off-mic)

MR SPEAKER

Order! Minis, kestyon lo langazman avek *SIF* i permisib an relasyon ek bann diferan proze.

MINISTER

BILLY

RANGASAMY

Mersi Mr Speaker. Mr Speaker, petet i en loportinite pour mwan met enn pti leklersisman lo sa pwen. Siperfisi ki sa proze pe pran an relasyon ek siperfisi zil Assumption. I enportan pour nou konpran sa.

E i enportan lekip aköz i, nou bezwen get li dan son konteks, en? Proze li menm i pour kouver siperfisi apepre 50ektar later. E Assumption son *area* i 1150ektar. So i pa ni menm en poursan, *hmm?*

E sa i enportan pour nou apresye sa. E letan nou get La Digue par egzantp, ou'n pran sa legzanp sa lotel *L'Orangerie*, sa i en lotel 63 lasanm. E sa proze lo Assumption i 37 lasanm, ki mannyer in ganny *downsize* sibtansyelman.

So i enportan pour nou get sa dan son lanpler, e konmsi i petet i kapab ganny konotasyon deor ki zil antye pe

ganny kouver, me i en pti poursantaz sa zil.

Mon pa konnen si ou'n vizit laba Onorab, me selman ou a kapab konpran – (i pa ti ale *ok*) – *so anyway* mon ti ava konsey ou fer sa vizit. Parske i ava ed ou konpran enn pti pe lanpler sa proze an relasyon.

E mon pa le al tro detay lo proze, me donn mwan en sans pour mwan eksplik...

(comment off-mic)

MR SPEAKER

Order! Order! Onorab Pillay les Minis fini. Les Minis fini. Minis.

MINISTER **BILLY RANGASAMY**

Donn mwan en sans pour mwan eksplike akoz kot i konsern. Akoz mwan Minis Later mon pe bezwen konpran enn pti pe ki kantite later in ganny – konsonmen anba sa proze.

E plan osi, Lotorite Plan osi i tonm anba mwan. Se sa mon'n partaz sa lenformasyon ek Lasanble, pour nou konpran e pour dimoun ki pe ekoute laba deor konpran enn pti pe osi lanpler proze. Sa i sa konteks ki mon'n reponn sa Onorab. Mersi Mr Speaker.

MR SPEAKER

Mersi. Ki ou'n dir *point of order, matter of privilege* - tou lede.

HON SEBASTIEN PILLAY

Wi Mr Speaker. Minis pe *mislead the House*. Mon pa'n zanmen ganny envite pour al Assumption mwan. So ki mannyer i kapab vin dir mon pa ti ale. Mon pa'n zanmen ganny envite pour al Assumption.

MR SPEAKER

Ok.

HON SEBASTIEN PILLAY

So ki mannyer ou pe dir mwan?

MR SPEAKER

Ale. Sanmenm tou. Bon *ok*. Si Minis in dir ou'n al Assumption...

MINISTER **BILLY RANGASAMY**

Mr Speaker, mon ti'n zis mansyonnen mon dir mon ti ava konsey Onorab. Parske mon osi mon ti annan en lot persepsyon zil. Mon ti a konsey ...

(comment off-mic)

MR SPEAKER

Mersi. Mon pe ganny enteripsyon avek tou lede kote. Minis, termin ou repons silvouple. Minis, mon bezwen,

mon bezwen fer zot konpran. Sa size proze Assumption i en gro proze, i en gro size e en kantite lenformasyon in sorti dan piblik parey Minis in fer remarke. In annan *EIA*, i annan *meeting* piblik, i annan vizit, i annan rapor lo lapres.

Sa sesyon ozordi i lo akse avek bann lenformasyon lo sa proze. Mon pe demann zot pour nou gard sa annord, pour gard bann kestyon e bann repons lo sa kestyon orizinal.

Si Manm i le en lot loportinite pour egzamin proze Assumption an detay, i pour bezwen rod en lokazyon pour li kapab fer li.

Donk pour sa kestyon la, nou bezwen gard li lo lenformasyon ki *available* pour piblik e langazman *SIF* parey sa de pwen kestyon in mete. Minis Joubert, mon a les ou termin ou repons.

MINISTER FLAVIEN JOUBERT

Mr Speaker. Mr Speaker, dezyenm parti kestyon par Onorab Henrie. Eski bann konsern in ganny servi pour in annan en lenfliyans lo sa proze? Wi. Parey nou konnen, e in deza ganny raport lo la. Lakantite villa in ganny redwir. E osi lakantite restoran ki sipoze annan. Ti pour annan 7 orizinalman.

Me letan bann diskisyon in ganny fer avek bann

partener, restoran in ganny redwir pour vin 4 e villa is sorti 42 in vin 37.

E i annan lezot bann diferans ki'n arive lo kote lafason ki bann batiman i ganny pozisyonnen lo zil, pour evite ki zot annan okenn lenfliyans lo sa bout bor lanmer kot nou konnen i annan bann lespes parey torti ki reprodwir.

Alor sa bann lenformasyon in ganny servi pour modifye sa proze. E sa bann lenformasyon i kapab ganny vwar si nou konpar versyon sa proze lo komansman e kot i ete ozordi. Mersi.

MR SPEAKER

Mersi Minis. Mon a pran kestyon Onorab Aglae.

HON EGBERT AGLAE

Mersi Mr Speaker. Mon a dir bonzour le de Minis. *PS, CEO*, e osi bonzour bann etidyan sorti Port Glaud, Minis, anvi ki ou ki Minis Rangasamy *sorry*.

Anvi ki ou ki *custodian* Lalwa kot i konsern *Land Registration Act* li menm, mon ti a kontan petet demann ou premyerman.

Lekel ki'n responsab pour donn sanksyon pour sa proze kapab komanse? E dezyenmman, lekel osi ki'n siny sa *lease agreement* ant

developeur parey ou'n ganny dir dan ou larepons? Mersi.

MR SPEAKER

Mersi. Minis, ou repons?

MINISTER **BILLY**
RANGASAMY

Mersi Mr Speaker. Mersi Onorab pour kestyon. Onorab, zis enn pti leklersisman kot i konsern *Land Registration Act*, i pa tonm anba mon Minister li. I tonm anba Biro *Attorney Zeneral*.

I annan en pti konfizyon touzour lo la be selman mon responsab tou bann later Leta me non pa bann *Land Registration*.

However, pour reponn kestyon lo sanksyon, sanksyon son proses i pas atraver mon Minister e lo sa proze lo sa lanpler, mon ti pran sa desizyon pour prezant li avek Konsey Minis e mon ti donn bann dat pli boner. Ti boner sa lannen ki ti pas kot Konsey Minis e *Cabinet* ti vreman deliber an detay lo la e zot ti pran en desizyon final.

E sa dezyenm parti kestyon, son aprouvasyon i ganny par Konsey Minis sanksyon. E dezyenm parti kestyon lo lekel ki ti siny sa *lease* ant Gouvernman ek *ID*, sa i ganny sinyen par Sekreter Prensipal Later dan mon Minister. Me sa *lease* ant

developeur e *IDC* sa i par *IDC* zot menm ek sa developeur.

MR SPEAKER

Mersi. *Sorry*, mon pa pour kapab pran klarifikasyon *extra*. Onorab Mondon ou kestyon.

HON TERENCE MONDON

Mersi Mr Speaker. Bonzour Minis avek ou lekip. Mon kestyon, mon premye kestyon i relye avek *EIA*. Minis in dir nou ki biosekirite ti pli gran konsern ki bann ki'n ganny resorti par bann dimoun ki'n partisip dan sa *process*.

Ki bann lezot konsern zot in resevwar e si tou bann size pe ganny adrese? E dezyenmman, Minis i annan en kantite keksoz pe ganny dir lo sa proze Assumption, eski tou lenformasyon ki pe ganny transmet avek piblik i korek? E donn nou legzanp bann keksoz ki pa korek. Mersi Mr Speaker.

MR SPEAKER

Mersi Onorab. Minis?

MINISTER **FLAVIEN**
JOUBERT

Mersi Mr Speaker. Mersi Onorab pour kestyon. Mr Speaker, apard ki biosekirite, byensir i annan osi bann lezot paramet ki ganny konsidere dan letid lenpak.

Par egzanp bann *utilities* otour sa proze, bann keksoz parey elektrisite, delo, salte eksetera, i enportan e in ganny leve koman bann pwen enportan pour prenon kont sa zil. E son zistans ki ete avek bann zil granitik.

I annan bann size otour zistans ek bor lanmer bann *set back limits*. I annan bann konsern ki'n leve otour biodiversite sa zil li menm ek bann popilasyon torti lo sa zil.

In annan bann konsern ki'n ganny leve lo aktivite maritim. Par egzanp ti pour annan plis aktivite otour zil ek lenpak ki sa pour annan lo bann lespes ki viv otour sa zil.

E tousala in ganny met devan e in ganny adrese atraver sa proze, sa prosesis *EIA*. E ou ava war ki bokou sa bann aktivite, ouswa sa bann kalite konsiderasyon in ganny modifye e serten in ganny menm retire.

Par egzanp bann aktivite *motorize sport* tro bokou lo kote lanmer, sa in ganny tire antyerman. Pour fer ki sa proze i tonm anliny avek laspe proteksyon sa *zone*, ki en *zone* proteze anba *marine spatial plan* Sesel.

Alor sa bann pwen in ganny pran e nou napa okenn krentif ki i pa'n ganny adrese lo son nivo ki merite adrese. Eski i annan lenformasyon fo? I annan. Mon pa oule al lo

serten, lo keksoz ki spesifik. Akoz mon kapab petet fer serten fot apre ganny akize konmkwa mon vin fann ankor fo lenformasyon.

Me selman fodre nou fer sir lenformasyon ki nou transmet konsernan sa proze. I annan serten lenformasyon par egzanp popilasyon torti lo nivo sansibilite sa zil, lo lefe ki bann aktivite pour annan lo lanvironnman maren par egzanp. Parey mon'n dir, aktivite maritim pour restrikte, zis bann *authorized* ek bann keksoz parey kayak eksetera.

Alor i annan serten lenformasyon pe donn serten lenpresyon. Me nou bezwen konpran ki i enportan ki nou konsilte bann dokiman ek bann dokiman ek bann plan ki'n ganny fer pour sa zil e non pa zis fer spekilasyon otour sa proze. Mersi.

MR SPEAKER

Mersi. Onorab Esparon, ou kestyon?

HON REGINA ESPARON

Mersi Mr Speaker. Bonzour Minis ek ou delegasyon. Mr , anvi ki anba sa proze Assumption i sipoze vin *clearing point* pour bato e osi avyon ki sorti aletranze ki pour akse laba direktman, ki mezir kontrol spesifik ki bann Lotorite pe mazin mentenir

pour asire ki tou Lalwa ek prosedir i ganny sivre? Mersi.

MR SPEAKER

Mersi. Onorab, ou kestyon in al en pe an deor kestyon orizinal. E parey mon'n dir mon annan lentansyon gard sa. Minis, mon pour les ou adres sa kestyon me solman ou a fer referans avek bann dokiman ki'n ganny prezante.

MINISTER FLAVIEN JOUBERT

Mersi Mr Speaker. Mr Speaker, mon pour kapab koz zis lo sa laspe biosekirite ek proteksyon lanvironnman sa zil, bann zil dan zalantour.

I annan en plan biosekirite ki kouver tou mouvman ki antre sorti lo zil Assumption. Sorti an deor pei, sorti lo Mahe eksetera. Me sa ki mwan mon okouran, ziska konmela bann plan detaye lo arive bann dimoun sorti dan lezot landrwa lo Assumption, pa ankor fini ganny met an plas antyerman.

Alor mon pa tro krwar i en moman pour nou fer spekilasyon lo mezir kontrol. Me selman sa ki nou konnen, se ki sak plan biosekirite i kouver bann risk ki kapab arive letan, oubyen si sa bann aktivite i komanse lo sa zil. Mersi.

MR SPEAKER

Mersi. Onorab Cosgrow. Mon a pran ou kestyon.

HON WALLACE COSGROW

Mersi Mr Speaker. Bonzour tou dimoun. Mr Speaker, vi ki Minis Rangasamy taler i dir nou ki tou bann dokiman an relasyon ek *lease agreement* i piblik kot Biro Rezistrar.

So eski Minis – mon premye kestyon, so eski Minis i kapab dir avek Lasanble, konfirm ek Lasanble si se en lakonpanyen apele *Assets Groups* ki'n siny sa *sublease agreement* avek *IDC*. E sanmenm sa lakonpanyen ki Gouvernman in donn sanksyonn pour siny sa *sublease agreement*? E ki rol anvi ki ou Minister ki fer – prosedir sanksyon ek *due diligence* dan sa bann ka koumsa, ki rol ki *FIU* in zwe ladan la ki nou tande, ki sa lakonpanyen pe ganny *investigate* dan *High Court* Lonm pour *possible terrorism financing*. Sa mon premye kestyon.

Dezyenm kestyon Minis, i al pour Minis Joubert. Anvi ki Minis Joubert i dir nou tou konsiltasyon in ganny swiv an sa ki konsern prosesis lanvironnman, mon pe mazine i pe koz lo la.

Eski - pour ki rezon alor ki *Chairman SIF* i dir avek nou poudir i pa'n ganny konsilte e nou a note poudir *Chairman*

SIF, i osi en *Trustee* lo *Board ICS* sa lorganizasyon ki pe fer *EIA*.

So kote ki'n ariv *breakdown* lenformasyon? E ki manner ki bann lenformasyon pa'n ganny pase avek *Chairman SIF*, ki osi *Leader of Government Business* ki *conveniently* pa prezan dan Lasanble ozordi bomaten. Manboulouk Mr Speaker. Mersi.

MR SPEAKER

Mersi. Minis, ou kapab adres kestyon.

MINISTER **BILLY RANGASAMY**

Mon ava kouver sa konponan kestyon lo sa *sublease*. Kontrer enn pti leklersisman boner, *head lease* i ant Sesel koman Sesel ek *IDC*. E son *sublease* i ant *IDC* e sa konpanyen i apel *Ocean Breeze*.

Ki anrezistre *Ocean Breeze*, i anrezistre kot osi anba kot *Land Registration*. Wi, mon kapab konfirmen ki konsiltasyon ti ganny fer avek *FIU*. Parey tou prosis sanksyon mon krwar ou konn byen Minister i *follow* sa prosedir.

E a sa moman ki nou ti fer sa travay. Sa lesanz avek *FIU*, ti napa okenn konplikasyon ki ti donn nou okenn dout pour otreman. Sa

ti a sa moman ki nou ti fer sa travay. Sa ti dan bann milye Zanvye 2024. Mersi Mr Speaker.

MR SPEAKER

Mersi Minis. Onorab Hoareau ou kestyon.

HON JOHN HOAREAU

Mersi Mr Speaker. Bonzour Mr Speaker. Bonzour tou dimoun.

MR SPEAKER

Order! Onorab Hoareau kontinyen avek ou kestyon.

(Interruption)

HON JOHN HOAREAU

Mr Speaker, mon kestyon i lir koumsa.

MR SPEAKER

Onorab, Minis in reponn kestyon, nou pour prosede.

(comments off-mic)

MR SPEAKER

Onorab, mon pe demann zot ankor enn fwa, annou gard lord - aret kriye dan Lasanble. Mon'n donn – mon'n donn laparol Onorab Hoareau pour son kestyon. Onorab Hoareau pour son kestyon.

HON JOHN HOAREAU

Mersi. Mersi ankor Mr Speaker. Mon kestyon i lir koumsa. Vi ki en *EIA class 1*

kot lenformasyon lo sa proze in ganny donnen piblik-

(Interruptions)

MR SPEAKER

Order! Onorab Cosgrow aret kriye dan Lasanble.

(Interruptions)

MR SPEAKER

Onorab. Mon pour met ou deor si ou kontinyen.

(Interruptions)

MR SPEAKER

Onorab Cosgrow, mon pour met ou deor si ou kontinyen enteronp Lasanble.

Onorab! Onorab Cosgrow ou a kit lasal silvouple. Onorab Cosgrow ou a kit lasal silvouple. Onorab Lemiel ti'n lev son lanmen avan. Ki ou annan Onorab Lemiel?

HON SYLVANNE LEMIEL

Mersi Mr Speaker. Mr Speaker, en leklersisman. Minis, mon pa konnen si ou pa'n war ti annan de kestyon ki'n ganny demande.

E Minis Billy Rangasamy in reponn enn. E Minis Joubert in lev son lanmen pour li reponn lot. Akoz enn ti adrese avek enn e lot ti adrese avek lot.

So ou'n les reponn enn. Mon pa konnen si ou'n vwar si

ou pa'n vwar. Me ou'n donn laparol a en lot Manm. Petet sanmenm sa ki annan sa protestasyon.

MR SPEAKER

Ok.

HON SYLVANNE LEMIEL

Petet Minis Joubert ou ti merit les li reponn sa kestyon. Mersi.

MR SPEAKER

Mersi. Mersi Onorab pour sa klarifikasyon. Mon pa ti'n war e si mon'n mank en kestyon, mon prezant mon leskiz. Mersi. Onorab. Ou annan en lot pwen Onorab Pillay? Wi? Remarke ki nou pe pran letan kestyon la en.

HON SEBASTIEN PILLAY

Wi, mon realize mwan Mr Speaker. Be selman mon pa konnen akoz tou sa bann keksoz bezwen ganny fer. I paret pour dir Onorab Cosgrow in demann en kestyon ou'n met li deor pour proteste.

Eski i kapab retourn dan Lasanble prezan Mr Speaker. Par lefe ki ou ki ti mal pour met li deor? *You were wrong.*

MR SPEAKER

Onorab Hoareau, ou kestyon.

HON SEBASTIEN PILLAY

(Off-Mic)

(Pa zafer men enkrwayab sa)

HON JOHN HOAREAU

Mersi Mr Speaker apre sa teat ki Lopoziyon pe fer. Vi ki – Mr Speaker, kestyon i lir koumsa. Vi ki en *EIA Class 1* kot lenformasyon lo sa proze in ganny donnen piblikman. E tou sa ki ti le demann kestyon ti fer li libreman.

E osi *IDC* in vin eksplik sa proze an detay avek Komite Lasanble *Food Security Sustainable Development*, eski Minis i kapab konfirman si i annan lezot lenformasyon ki Lasanble pa'n gannyen lo sa size? Etandonnen ki Lopoziyon pa oule partisip dan sa Komite.

MR SPEAKER

Mersi. Minis, ou repons.

MINISTER FLAVIEN JOUBERT

Mersi Mr Speaker. Larepons pli kourt se non. Napa nouvo lenformasyon ki pa'n ganny donnen avek piblik ouswa ki piblik pa kapab akse ozordi konsernan sa proze. Mersi.

MR SPEAKER

Mersi. Onorab Spiro. Ou kestyon.

HON RACHEL SPIRO

Mersi Mr Speaker. Bonzour Minis avek ou delegasyon. Bonzour tou koleg Onorab. Bonzour bann etidyan dan

Galeri. E bonzour tou dimoun ki a lekout.

Mr Speaker, piblik i anvi konnen akoz *EIA*, i spesifikman lo sa proze. Me nou'n war en kantite devlopman ki'n arive lo sa zil avan. Par egzanp nou'n war *airstrip* ki'n ganny konstrir san ki ti annan okenn konsiltasyon. Nou, nou le konnen ant sa bann antite la. Lekel ki pe koz laverite?

Parske Minis letan ti demann ou kestyon - Minis Joubert mon pe adrese la - ler ti demann leksplikasyon si ou okouran i annan en *airstrip* pe ganny fer, ou ti dir ou pa okouran. La pli tar ou pe vin donn nou leksplikasyon lo en proze ki'n ganny soumet pli tar.

Lekel ki pe donn lenformasyon ki korek ant ou, *SIF*, Prezidan, e tou dimoun ki enplike dan sa proze? Nou anvi konnen.

MR SPEAKER

Minis, nou konsern i avek sa kestyon ki devan nou. Lenformasyon ki pe ganny donnen avek Lasanble. Minis, mon a demann ou pour adres kestyon dan sa perspektiv.

MINISTER FLAVIEN JOUBERT

Mersi Mr Speaker. Mon ava fer kler lenformasyon ki mon ti fer sorti e mon ava eksplik

Onorab kot i sorti sa bann permisyon.

Letan mon ti ganny demande kestyon ti konsern *airstrip* Cosmoledo.

(APPLAUSE)

MINISTER FLAVIEN JOUBERT

Airstrip Cosmoledo pour ou lenformasyon Onorab, ti ganny aprouve par *Cabinet* letan Onorab Cosgrow ti en Manm. Mon pa konnen si i pa ti war, me selman pa mwan ki ti aprouv *airstrip* Cosmoledo sa letan.

Airstrip Assumption mon'n ganny lenformasyon avek *IDC* direktman ki permisyon ti ganny donner 2017, pour li *extend for commercial purposes*. So vwala lenformasyon konsernen *airstrip*. *Thank you*.

MR SPEAKER

Mersi.

HON RACHEL SPIRO

Mr Speaker?

MR SPEAKER

Kestyon i ganny reponn. Mon pour...

HON RACHEL SPIRO

Klarifikasyon Speaker...

MR SPEAKER

Mon pour, mon pour fer enn pti leksepsyon la akoz mon konnen letan pe pase. Mon pour pran kestyon le 2 *Whip* akoz mon donn zot en pti pe sinyorite dan Lasanble.

Premye mon a demann, mon a pran kestyon Onorab Lemiel.

HON SYLVANNE LEMIEL

Mersi Mr Speaker. Mr Speaker baze lo lenformasyon ou dokiman relye avek sa proze, mon ti pour kontan Minis donn mwan sa detay swivan. An sa ki konsern sa *sublease* ant *IDC* avek *Ocean Breeze*.

Mon ti a kontan konnen petet konbyen sa *lease* in ganny vann? E lekel petet ki'n ganny larzan avek sa *sublease*? Mersi.

MR SPEAKER

Mersi. Minis.

MINISTER BILLY RANGASAMY

Mersi Mr Speaker. Onorab Lemiel, parey mon'n fer resorti, sa lenformasyon i la kot Biro Lanrezistremman. Be selman mon kapab dir ou ki i pour environ \$20 milyon. – pardon-

MR SPEAKER

Minis.

MINISTER BILLY RANGASAMY

\$20 milyon pour - i pour ganny peye par diferan staz peyman. Sirtou dan letap konstriksyon i annan en peyman *upfront* ki pour ganny fer lafen sa lannen. E larestan la balans pour ganny peye pandan 2025.

Me tou sa larzan pour antre dan *Consolidated Fund*.

MR SPEAKER

Thank you.

MINISTER **BILLY**
RANGASAMY

Tou pour antre dan *Consolidated Fund*. Sa mon kapab konfirman. Sa ti en desizyon ki Konsey Minis ti pran. Ti napa okenn larzan par egzansp ki pour al kot *IDC* pour antre dan *Consolidated Fund*.

IDC li par kont, oubyen *GICC* i pe egzekit proze lo sa zil si i ganny aprouvasyon Planning. Li son Kontra i pa tro fasil pour mwan donn en *figure* la. Me i en Kontra anviron, mon pe estimen dapre mon konpran anviron en \$70 milyon konstriksyon.

So sa li osi pour annan bann retonbe ki pour vin pour pei, pour ki i a rantre dan reveni pei. Sa i enn pti pe zeneralman. Apre pour sir proze i annan plizyer retonbe parey kestyon ti pe ganny demande boner.

I annan plizyer retonbe ki Gouvernman pour benefisyé, pei pour benefisyé dan lavenir. Pa bezwen ki mon al an detay lo la. Be solman ou'n demann mwan spesifikman sa *sublease*. Sa i en pe bann konponan finansyer ki al avek.

Apre ler ou ava – parey mon'n dir i annan bann lezot detay apre en peryod letan par an i annan en *annual rent* ki pour bezwen peye. Apre en dele letan ki'n ganny agree lo la dan sa *sublease*.

Ki Gouvernman pour kontinyen resevwar en serten sonm larzan par an apre en peryod letan. Sa 20 milyon i *upfront*, pour sa peryod inisyal. Apre pli tar nou pour kolekte tou le-z-an en sonm pour son *annual rent*.

Parey tousala i dan sa *sublease* si ou pase ou ava war. Mersi Mr Speaker.

MR SPEAKER

Mersi. Onorab Arissol, ou kestyon.

HON SANDY ARISSOL

Mersi Mr Speaker. Bonzour Minis avek ou lekip. Tou bann zanfan dan Galeri ek zot ansennyman. Tou dimoun ki pe ekoute. Mr Speaker mon ti a kontan komanse par en mis-apreansyon ki'n ganny fer lo enn mon Manm.

LGB, ki pa prezan ozordi. Nou tou nou konnen poudir

LGB avek lezot responsabilite ki i annan. I pa vedir ki i pa'n vini spesifikman ozordi.

Semenn pase nou ti annan detrwa bann Manm *US* ki pa ti dan Lasanble. Nou ti war kot zot ti ete dan ler Lasanble Nasyonal lo rezo sosyal. Mersi Mr Speaker. Alor...

Mr Speaker, mon osi bezwen rapel bann dimoun ki pe ekoute poudir Assumption ti'n preski ganny vann pour en sitar. Se *LDS* ki'n sov Assumption ozordi. Alor mon kestyon. Alor mon kestyon ki mon ti a kontan demann avek Minis - de pti kestyon senp, mon'n kontan letan Minis ou'n *call* lo sa zafer *EIA*. Bel Ombre fek fer *EIA* pour proze Gran Barbe dan mon distrik Bel Ombre. I annan pti gin dimoun ki'n vini. Mwan mon'n ale parske mon kontan tou mon zil e mon kontan tou bann proze ki pe ganny fer dan mon pei.

Alor mon kestyon ki mon ti a kontan demann Minis lo *EIA*, eski ou satisfè Minis ki tou lenformasyon neseler. Parske menm mon war bann zournalis zot in ganny sans ale pour al vwar pour demann kestyon, pour zot kapab tir portre.

Eski tou lenformasyon neseler ozordi ler nou pe koze pour sa proze ki ti pli gro ki'n vin *downsize* in vin pli pti,

pour pran kont lanatir, prezervasyon, tou keksoz, tou lenformasyon, tou bann lazans neseler in gannyen? Mon premye kestyon.

Mon dezyenm kestyon ki mon ti a kontan demann ou, anvi ki Sesel ler nou, nou ti pe lekol nou ti ganny dir nou annan 115 zil dan nou larsipel. Nou annan zil ki abandonnen, nou annan zil kot bann Komoryen, *Sri Lankan* i antre, zot vol nou banbara, zot touy nou torti bann Malgas, zot kanpe, zot met latant, zot fer en kantite dezord lo nou bann zil.

E i lwen avek kot nou, nou baze isi. Alor Minis eski ozordi letan nou annan en proze koumsa lo Assumption ki pran 2erdtan edmi sorti Mahe dan enn pti avyon, pour al laba, eski bann proze parey lotel, letan laferm Coetivy ouver pour kanmaron, byento kekfw nou ava annan bann zil ki ava ede avek plante pour soutenir nou popilasyon ;

Eski da proze Assumption ozordi avek bann lezot proze ki ava annan lo bann zil koman en Gouvernman responsab, eski bann proze irresponsab nou pe koz lo la Minis? Eksplik nou enn pti kou. Mersi bokou.

MR SPEAKER

Mersi. Minis. Mon krwar Onorab in depas enn pti gin.

Minis, ou ava adres kestyon e pa bliye poudir nou lo lenformasyon ki pe ganny donnen.

MINISTER FLAVIEN JOUBERT

Mersi Mr Speaker. Premye parti kestyon Onorab se eski nou satisfè ki *maximum* lenformasyon in ganny donnen avek piblik e *maximum* lenformasyon in ganny servi pour nou fer desizyon?

Mon pour dir wi. Piblik in ganny akse ek tou lenformasyon; in ganny loportinite pour fer sorti tou zot bann konsern ek tou bann komantr.

E dan preparasyon dokiman *EIA*, nou'n fer sir ki nou *capture* preski tou bann lenformasyon ki bann dimoun in vin avek e analize pour vwar ki mannyer nou kapab adres zot.

Alor mon pour dir ki nou ase satisfè e okenn nouvo komantr osi nou ankor *still* ouver pour nou ganny okenn komantr avek okenn nouvo dimoun. Akoz tanzantan nou ganny bann *emails*, bann *phone calls* eksetera. E nou kapab donn dimoun lenformasyon konsernan sa proze.

Kot i konsern bann zil, wi Mr Speaker, nou konnen poudir i bezwen annan plis

prezans dan bann zil dan sid. I annan bokou bann risk avek bann dimoun sorti dan bann pei akote, sirtou Madagascar ek *Comores*.

E prezans en aktivite touristik ek osi sekirite dan sa landrwa e kapasite pour kapab ariv laba pli vit avek pli bon akse par avyon, i pour ede dan en bon pe fason pour koup sa bann aktivite ilegal ki pe arive lo sa bann landrwa.

Nou'n war par egzantp ki plizyer fwa dimoun i vini i antre dan bann landrwa parey lagon Aldabra e zot lapès, zot pran bann lespes zot fer bann dega. E annefe enn bann risk biosekirite ki nou war dan sa landrwa, se ki menm si Assumption parey in deklare i pour tir lera, Aldabra osi i pe prepar li osi pour li esey tir lera lo Aldabra *atoll* antye.

Me si nou ankor annan mouvman dimoun ki pe ale vini dan sa bann landrwa, nou pour *still* annan en masiv risk ki an deor nou kontrol.

E alor i enportan ki nou annan bokou plis prezans dan sa landrwa. In annan en striktir ki kapab siport sa prezans ki bezwen annan dan sa landrwa.

Savedir ou bezwen annan lizye ou bezwen annan bann fasilite parey bato, ou bezwen annan fason pour ariv laba par avyon, ou bezwen annan lezot dimoun, menm

parey bann dimoun militer dan sa landrwa pour vreman ogmant sa prezans dan sa rezyon.

E nou konn tre byen Aldabra son larzer ki ete, son longer, letan ou annan aktivite lo lot kote i difisil pour sa bann dimoun kot sant resers vitman ariv lo lot kote zil.

E menm danzere, e alor ou bezwen annan bokou plis prezans e bokou pli *assets* dan sa landrwa pour ede avek sa aktivite. Alor pour nou Mr Speaker, nou krwar ki bokou plis prezans i osi ede dan nou zefor pour asire ki bann zil pa ganny abize e i pa ganny masakre dan serten fason, parey i pe ganny fer aktyelman. Mersi.

MR SPEAKER

Mersi. Wi, *Chairman Planning Authority* i anvi adrese?

CHAIRMAN PLANNING AUTHORITY CYRIL BONNELAME

Mersi Mr Speaker mersi. Bonzour Manm Lasanble. Bonzour tou dimoun a lekout. Zis en klarifikasyon an term lenformasyon ki *available* dan *public domain*. Mon krwar dan prezantasyon *press* ki ti al laba i annan en bout sa lenformasyon ki mon krwar in kree en serten dout.

Akoz en kantite in vin war kestyon ki enn sa bann

zournalis ti dir i bezwen al rod satelit pour vwar kan devlopman ti komanse, kan devlopman ti *attend timeline*.

Parey Minister in dir se zot vwar ler zot ti *submit* aplikasyon pour *extension airport*, avek ler nou ti aprouve - parey zot tou konnen, ler ou *submit* en aplikasyon ou bezwen *clear site* pour fer *pegging* pour kapab *identify* kote ou devlopman pe vini.

E parey bann ki'n al Assumption in vwar i en zil ki *basically* in ganny *mined*, i annan en kantite trou ladan. So mon krwar i natirel e mwan mon ti demann sa kestyon *CEO IDC* akoz ki sa bann bout later letan ou regarde. Be akoz ou ti bezwen ranpli sa bann trou, i annan bann gran, gran trou, i annan lakav *actually*.

So sanmenm ou vwar ki ler ou pour regard sa portre satelit, ou pour war poudir i annan mouvman. Me sa mouvman se bannla ti bezwen *clear* sa *site*. Akoz parey ou konnen, nou bezwen *clear site* pour nou fer *pegging*, pour *Planning* kapab Lotorite konsernen kapab aprouve. Mersi Mr Speaker.

MR SPEAKER

Mersi. Bon, mon a pran kestyon pran kestyon Onorab Larue.

HON FLORY LARUE

Mersi Mr Speaker. Bonzour Mr Speaker. Bonzour Panel ek Minis sa de Minis. Mon ti a kontan demann *panel*, lefe ki nou'n tann mansyonn *meeting* piblik e nou'n ganny dir ki kantite dokiman ki aksesib avek pour piblik.

Eski Minis i kapab dir nou si ti annan en *meeting* piblik pour prononse lo, pour fer en, pour dir ki sa proze pe vini. E dan sa *meeting* piblik eski i kapab dir nou si i annan okenn limitasyon ki kalite kestyon e ki kalite lenformasyon ki piblik i kapab ganny akse avek, tetan zot *attend* sa bann *meeting*?

E si ou annan statistik konbyen dimoun ki ti vin *meeting* Minis? Mersi.

MR SPEAKER

Mersi. Minis lekel ki pran laparol?

MINISTER FLAVIEN JOUBERT

Mersi Mr Speaker. Mon ava pran laparol. Kot i konsern *meeting* piblik eski i annan limitasyon? E mersi Onorab pour ou kestyon.

Eski i annan limitasyon lo kwa ki piblik i kapab demande? Non, napa okenn limitasyon. Menm si nou pe fer en *meeting* konsernan letid lenpak bann piblik i kapab demann kestyon otour sa proze.

E zot kapab demann kestyon par egzanp lo lekel promoter? Lo ki bann laranzman finansyel eksetera ek Gouvernman ki an deor sa letid lenpak. Me selman i kapab ganny demande akoz i en lokazyon pour sa proze ganny ekspoze avek piblik.

Alor pour nou, nou krwar ki *meeting* i ouver e dimoun i ganny sans pour zot koze.

Lo kote kantite dimoun ki nou ti gannyen. Letan mon pe gete, pour bann *stakeholders* Gouvernman, nou ti ganny dimoun 33 dimoun ki ti *attend*. E pour *EIA meeting* nou ti ganny 60. Mersi Mr Speaker.

MR SPEAKER

Mersi Minis. Mon a pran kestyon Onorab Vidot.

HON AUDREY VIDOT

Mersi Mr Speaker. Minis, si konsiltasyon in ganny swiv byen. Akoz ki nou'n tann *Chairman SIF* konplent? La ki Minis Joubert i paret mwan ou okouran tou saki pe pase, fe lo Assumption. Prezan eski ou kapab dir nou Minis, ki mannyer nou pour kapab ganny lenformasyon ki kredib an relasyon lo lekel ant ou Vis-Prezidan, *Chairman SIF* ki nou konnen i Onorab Georges, e tou bann lezot dimoun ki'n koz lo size Assumption ki pe koz ki pe dir nou laverite.

MR SPEAKER

Onorab, ou pe repet, ou pe repet kestyon Onorab Spiro e ou pe met an kestyon kredibilite Minis Joubert. I pa – i pa akseptab.

HON AUDREY VIDOT

Point of order! Point of order Mr Speaker.

MR SPEAKER

Ki point of order?

HON AUDREY VIDOT

Minis pa'n reponn kestyon Onorab Spiro.

MR SPEAKER

Be sa. Be sa pa fer ou kestyon pli...

HON AUDREY VIDOT

Ou pa kapab zis koup mon *micro* Mr Speaker

MR SPEAKER

Sa pa fer ou kestyon pli valab. Minis mon pa konnen si ou kapab war okenn eleman sa kestyon ki annan pour fer avek lenformasyon ki *available* pour piblik.

Silvouple ou a gard ou repons lo sa size.

MINISTER FLAVIEN JOUBERT

Mersi Mr Speaker. Onorab, ou'n dir mwan mon konn tou sa ki pe pase lo Assumption. Non mon a konnen. Mon konn

sa ki mwan mon konnen. An term dokiman ki mon'n ganny prezante e lenformasyon ki mon'n anmase, ouswa ki mon bann *staff* i fer mwan ganny akse avek letan sa proze pe ganny fer.

Alor mon pa kapab reklanmen ki mon konn plis lo Assumption e ki mon kapab antre an konpetisyon laverite ek lezot.

Mwan mon donn sa ki mwan mon annan koman lenformasyon. Lot keksoz se akoz ki i annan sa konplent? Mwan Onorab kot i konsern *Chairman SIF* i lib pour li fer son komantr lo sa proze. E i ti deklare lo televizyon ki i pe fer son komantr lo en baz prive, me osi koman *Chairman SIF*.

E i aktyelman responsab pour li pour li fer son komantr akoz li ki Chairman sa lorganizasyon. E i pour irresponsab pour li pa dir nanryen e asize trankil. Alor pour mwan, mon pa war li mal. E en keksoz kot i konsern komantr Mr Speaker.

Mon krwar i enportan pran note se ki letan nou konsilte piblik, i pa vedir nou pran tou rekomandasyon e nou met dan proze.

Nou bezwen balans sa bann rekomandasyon avek lezot konsiderasyon e fer sorti en keksoz ki reprezant en pli

bon, en pli bon konpromi pour sa proze.

Alor Chairman *SIF* in fer son komanter, wi. Me nou lo nou kote nou bezwen balans li e fer sorti avek en proze ki satisfè tou dimoun e i satisfè pei osi.

Alor mon krwar i *ok*, i pa en problem pour li fer komanter e son komanter i ganny resevwar dan piblik e nou osi nou'n ekoute. E nou osi nou'n pran kont serten pwen ki'n ganny leve dan komanter *SIF* e dan komanter Chairman. *Thank you.*

MR SPEAKER

Mersi Minis. Onorab Naidu, mon a pran ou kestyon.

HON SATHYA NAIDU

Mersi Mr Speaker. Zisteman pli boner koleg lo lot kote lata ti pe *impute an improper motives* vizavi *LGB*. Mon kapab konfirman poudir yer ler nou ti'n zwenn li byen boner, 9 er i ti'n fer resorti poudir akòz i pa pour avek nou ozordi.

E nou t ou nou konnen poudir Onorab Bernard Georges i met plizyer sapo. I annan en kantite responsabilite, i pa en nanryen fer ki'n vin lo en tiket *rebate*...

MR SPEAKER

Onorab ou pe

HON SATHYA NAIDU

Parey serten endividi...

MR SPEAKER

Wi, ou pe repete.

HON SATHYA NAIDU

E alors *PNQ* ti'n antre 1er...

MR SPEAKER

Ou pe repete.

HON SATHYA NAIDU

So he was not conveniently present, i mal...

MR SPEAKER

Onorab!

HON SATHYA NAIDU

I mal pour fer en *statement*...

MR SPEAKER

Mon pour envit ou, mon pour envit ou pour pos ou kestyon. Akòz nou napa bokou letan. Mon apresye ou pwen. In ganny fer par Onorab Arissol. Mersi ou kestyon.

HON SATHYA NAIDU

E lo size kestyon. In annan en rapor tou resaman. Ki kree en lenpresyon konmkwa i annan en konfli ant *SIF* avek *IDC*. I annan en konfli ant Dokter Dogley avek Mr Glenly Savy.

E i annan en *EIA* ki'n ganny fer, ki dapre zot i annan serten rekomandasyon ki merit ganny zwenn. Me i pa pe ganny zwenn e se sa rezon ki

mwan mon panse ki Onorab Georges in adopte en en tel pozisyon.

E an menm tan mon bezwen fer resorti Mr Speaker silvouple permet mwan, ozordi *LGB* i lib pou annan en lopinyon.

MR SPEAKER

Wi, wi, wi.

HON SATHYA NAIDU

Vizavi sa proze, akoz nou pe viv dan en demokrasi modern, vibran, kot i annan diverzans lopinyon.

(Interruption)

MR SPEAKER

Order! Onorab, mon'n fer ou- Onorab mon'n fer ou remarke ki ou ti'n fini dir komanter lo Onorab Georges in ase. Mon pa'n sezi lekel kestyon ou'n demande egzakteman.

So nou'n terminen, nou'n terminen avek ou. Minis, Minis, si ou annan okenn repons pou donn Onorab Naidu ou annan laparol.

MINISTER FLAVIEN JOUBERT

Mersi. Mersi Mr Speaker.

MR SPEAKER

Hold on, en pti moman. Wi, mon a pran *point of order* Onorab Vidot.

HON AUDREY VIDOT

Mr Speaker, anba *order* 8, mon oule konnen ki mannyer ou pou diriz en sesyon Lasanble ozordi? Akoz mwan ou koup mon *mic* mon pa ankor fini demann mon kestyon mon rod mon leklersisman.

Selman Onorab Naidu i kapab fer *statement*...

MR SPEAKER

Wi, ou- akoz...

HON AUDREY VIDOT

Ou koup ankor mon mikro - i pa akseptab Mr Speaker!

MR SPEAKER

Onorab Vidot, mon pou demann ou osi aret enteronpe. Ou ti'n - ou kestyon mon'n eksplike akoz ou kestyon pa ti annord. Onorab Naidu in poz en kestyon - Minis, si ou kapab adrese.

MINISTER FLAVIEN JOUBERT

Mersi Mr Speaker. Mr Speaker, parey mon ti'n fer remarke letan mon ti reponn kestyon Onorab Arissol, nou pran tou lenformasyon e nou donn tou lenformasyon ki nou annan.

Me selman sa prosesis menm si nou'n ariv a lafen sa prosesis *EIA*, nou reste ouver pou okenn diskisyon. Si i annan okenn komanter sorti

kot okenn parti enkli *SIF* ki zot oule adrese siplemanter avek nou, nou departman i reste ouver.

Departman i en lorganizasyon piblik ki resevwar lenformasyon sorti dan tou kote e ki pare pou kontinyen angaz avek tou bann diferan antite. Pou fer sir ki nou ganny pli byen posib sa desizyon lo sa proze.

Alors si i annan okenn konversasyon ki nou bezwen fer siplemanter, nou ava fer avek Onorab Georges ek *SIF* ek son *Board*. E nou ava trouve kwa ki vreman signifikan ki nou bezwen fer antre dan sa proze.

Alor, nou pa'n ferm laport pou diskisyon. E annefe tou diskisyon i kontinyen e i menm annan piblik i ki ankor pe demann nou kestyon konsernan sa proze e nou pou kontinyen diskite. Mersi.

MR SPEAKER

Mersi Minis. Mon a pran kestyon Onorab Labrosse.

HON RICHARD LABROSSE

Mersi Mr Speaker. Minis, mon'n ekout larepons ki'n ganny donner espesyalman konsernan sa Lotorite *Planning* ki'n donn en pe leta sa zil laba ler nou pe koz dan lenformasyon piblik.

CEO Planning in fer sorti bann dega ki'n annan en pe lo

sa zil atraver bann dega parey nou dir natirel ki'n arive, sirtou nonmen ki i annan bann trou dan zil. Mwan mon kestyon i *comme* swivan pou Minis Lanvironnman; -

Minis, mon ti a kontan konnen an se moman la ler sa proze pe ganny fer zot in fer resorti ki zis en bout zil osi ki pe al ganny servi pou sa proze, Ki zot plan Gouvernman pou re baliz sa landrwa konmsi pou remet li dan son leta natirel en pe?

Aprè mon dezyenm kestyon...

MR SPEAKER

Non, si ou annan ou kestyon lo lenformasyon adrese Onorab.

HON RICHARD LABROSSE

Ok, mon dezyenm kestyon i konsern *SIF*. Vi ki ozordi kestyon i pe demann konsiltan *SIF*. Minis mon konnen ki *SIF* in ganny etabli en bon pe letan pase.

Mon ti a kontan konnen ozordi ki nou pe koze, ki fason travay Gouvernman ant *SIF*, ki pou fer sir ki *SIF* osi zot annord ek zot bann resours ek zot devlopman pou zot kapab fer bann travay parey a lavenir ler i annan bann proze parey? Mersi.

MR SPEAKER

Minis, wi, ou kapab adrese.

MINISTER FLAVIEN JOUBERT

Mersi. Mersi Mr Speaker. Mersi Onorab pou ou kestasyon 2 parti. Kot i konsern reabilitasyon, reabilitasyon i ganny kouver son komansman reabilitasyon i ganny trouve dan dokiman *EIA* an term bann *management plans*.

Me pou plizyer, *I mean* pou rezon detaye osi, en bon pe fwa bann zil zot vin avek en lot plan reabilitasyon pli detaye enn fwa ki proze i demare. Me Assumption dapre diskisyon ki nou'n annan, i annan posibilite ki nou pou annan en plan vreman konpreansiv pou reabilitasyon sa zil, pou fer sir ki serten lespe i ganny re etabli.

Parey i annan bann zwazo ki nou apel bann Fou, parey i annan Tyomityo ki annan Aldabra eksetera. E osi vezetasyon ki'n ganny detri en kantite par ekstansyon *guano*.

Alor i annan en plan reabilitasyon ki pou vini ki pou swiv sa *process approval EIA*, ki i osi i pou ganny mete koman en dokiman piblik ki dimoun i kapab konsilte.

E annefe serten antite ouswa serten endividi i kapab menm vin bann partisipan dan sa proze reabilitasyon.

Kot i konsernan fason travay ek *SIF*, nou Minister i travay vreman an kolaborasyon pros avek *SIF*.

SIF i en lorganizasyon gouvènmantal ki pe administre bann sit Leta.

E nou napa okenn difikilte pou nou apros *SIF* ouswa pou nou fer bann diskisyon regilye avek zot. E parey mon'n fer resorti, nou ouver pou nou annan okenn diskisyon ki *SIF* i anv'i fer pou adres serten pwèn ki zot kapab annan, ouswa serten konsern ki zot kapab annan anba sa proze.

Alor pou nou Mr Speaker, nou konsider nou relasyon travay avek *SIF* koman enn ki mars byen e ki pa annan okenn difikilte aktyelman. E ki kapab *accommodate* tou sa bann konsern ki annan ki pe ganny koz lo la ozordi. Mersi.

MR SPEAKER

Mersi Minis. Mon aprezan pran bann kestasyon siplemanter, Onorab Pillay.

HON SEBASTIEN PILLAY

Mersi Mr Speaker. Mr Speaker, mon ti a kontan ki Minis i klarifye sa *timeline* pou mwan.

Nou'n tann en kantite keksoz ganny dir lo sa proze. *Suddenly SIF* i sorti e *Chairman SIF* i mon koleg *Leader Zafer* Gouvènmàn Onorab Bernard Georges - patron *SIF* i Prezidan. Ki li menm in donn sanksyon pou

sa proze, i sorti e pe konplent konsiltasyon lo sa proze. E Minis i dir nou poudir tou dokiman i *available*, tou dokiman i la.

Be si tou dokiman i la, si tou konsiltasyon in ganny fer, pour ki rezon ki *SIF* pou konplent fer tou sa tapaz dir tou sa keksoz lo size sa proze? Pour ki rezon?

Mon dezyenm kestyon Mr Speaker. Nou ganny dir par *Planning Authority* e Minis pou Later ki tou dokiman *Planning* i annord, tou dokiman i sipoze la. Minis pa'n kapab vin dan Lasanble ek en *folder* ki montre nou tou sa dokiman, i dir mwan al servi al war akse a lenformasyon pou ou rod lenformasyon.

Kan li i ti devret pe annan sa bann lenformasyon devan li koman Minis ansarz Later, en dosye ki annan tou dokiman lo Assumption devan li. I napa, i pe dir ou kote pou al rode savedir in ganny dir pou vin dir mwan sa dan Lasanble.

Alors Mr Speaker, ki mannyer ou kapab dir nou i annan en *approval in principle*? I annan dokiman e dapre zot prop parol ler mon pe dir sa ki zot in dir Mr Speaker ki dwatet piblik. Alors, mon ti a kontan demann Minis, lekel sa bann dokiman ki pa dwatet piblik? Se Minis Joubert ki'n dir lo

verbatim. Lekel sa bann dokiman ki pa dwatet piblik?

Mon dernyen pwen Mr Speaker. Mon dernyen pwen ou a permet mwan Mr Speaker. Eski se pour sa rezon ki Prezidan pe rod en mwan dan lofis pou li bril dokiman Assumption? Pou li kasyet li pe arive? Pou li kasyet zot pe vann nou zil? Se sa...

MR SPEAKER

Ou'n demann mwan en dernyen pwen e ou'n fer 3 en sel kou. *Ok*. Minis nou annan 2 kestyon ki'n ganny poze, ki mon krwar in tous lo bann lenformasyon ki zot in donner. Alors mon a permet sa 2 kestyon.

Me selman lo size akse avek dokiman piblik, mon fer bann Manm remarke ki dan *Standing Order* i dir ou ki kestyon i pa relevan si lenformasyon i la *accessible* pou piblik. So Manm Lasanble i kapab swiv sa. Mersi Onorab.

HON SEBASTIEN PILLAY

Vedir lenformasyon ki dwatet...

MR SPEAKER

Minis, ou repons.

MINISTER BILLY RANGASAMY

Wi. Mr Speaker, avek tou respe ki mon annan pou Onorab. Mon annan en *file*

devan mwan e i *file* sanksyon. *File Planning* tou keksoz i *online* konmela Mr Onorab.

E si mon pou mars ek sa gro *file*, pou bezwen bouret pou vin avek. So se sa. Be i annan sa lenformasyon, napa naryen pou kasyet. I annan sa lenformasyon. Petet mon a demann *CEO, Chairman-Chairman* Bonnelame pou eksplik en pe, bann prosedir ki an plas ki anba Lalwa nouvo Lalwa *Physical Planning Act* pou ganny akse ek sa bann lenformasyon.

Les mwan mon ava eksplik li, mon a donn li sa loportinite avek ou permisyon Mr Speaker?

MR SPEAKER

Mersi. Minis.

MINISTER **BILLY**
RANGASAMY

Akoz, osi i en soumisyon prive, en devloper pe fer en soumisyon en *outline planning application*.

MINISTER **BILLY**
RANGASAMY

I annan konotasyon komersyal, i annan konotasyon ki ou pa kapab zis met sa dan domenn piblik akoz i kapab son bann nide i kapab ganny pran avek en lot dimoun.

So se sa, i pa fizikman dan domenn piblik la partou.

Me selman i annan fasilite, i annan prosedir pou ganny akse avek. Zis parey ou fer ou aplikasyon Onorab, fer konmsi ou pe fer ou lakaz prive ou, fer ou aplikasyon ou pa met dan domenn piblik partou.

Me selman, non par egzanp mon pe dir en- ok en lot dimoun pe fer son lakaz ou pa kapab. I en proze prive, i annan prosedir pou met an plas. E prosedir anba akse lenformasyon nou pou kapab demann sa dimoun eski i ok pou donn ou soumisyon avek en *third party*?

I annan bann prosedir pa zis en keksoz ou met, me par kont *EIA* li i en dokiman ki piblik, bann *lease* i bann dokiman ki annan akse kot *Land Registration* eksetera.

So Mr Speaker, avek ou permisyon mon a les *Chairman*, akoz li ki *Chairman Board* Lotorite Plan i a donn en leksplikasyon lo sa bann dokiman. E prosedir an plas. Mersi.

MR SPEAKER

Mersi. Nou a ekout Chairman silvouple. Mersi.

CHAIRMAN **PLANNING**
AUTHORITY **CYRIL**
BONNELAME

Mersi.

MR SPEAKER

Onorab Larue ou ava aret enteronpe?

CHAIRMAN **PLANNING**
AUTHORITY **CYRIL**
BONNELAME

Mersi Mr Speaker.

MR SPEAKER

Chairman.

CHAIRMAN **PLANNING**
AUTHORITY **CYRIL**
BONNELAME

Mersi Mr Speaker. Mr Speaker, mon pou en pe bref akoz tou lenformasyon ki konsern *Planning Authority* parey si ou vwar anba seksyon 37 Lalwa ki Lasanble ki'n aprouve ki nou, nou travay avek 37(b) spesyalman kot *outer islands* i konsernen.

Akoz parey zot konnen lo, kot i annan distrik i al dan distrik, me pou *outer islands* i spesifye an seksyon 37(2) ki *outer islands* i dan kot Lotorite *Planning*.

So zot *free* pou vini pou vwar bann aplikasyon ki pe ganny ankor konsidere, parey mon'n dir. Akoz nou pa ankor aprouv naryen la, i annan bann *back and forth* avek zot akoz i annan bann soz ki manke bann - mannyer ou dir sa? Bann dimansyon lo *detail planning application*. So nou ankor pe kominik avek zot. So an sa ki konsern lenformasyon

parey mon'n dir i avek Lotorite Plan. Mersi.

MR SPEAKER

Mersi. Bon, avek sa nou termin sa sesyon lo kestyon. Mon remersye Minis e bann zofisye pou zot repons. Onorab, Onorab mon'n...

(comments off-mic)

HON SEBASTIEN PILLAY

Mr Speaker.

MR SPEAKER

Sesyon - sesyon kestyon in terminen. Mersi bann Minis. Lasanble a rebran 11 er pou leres kestyon. Mersi.

(BREAK)

MR SPEAKER

Nou a rebran lo *Order Paper* avek bann kestyon. Madanm *Hansard* raporter ou ava apel Minis e zofisye silvouple.

Onorab Pillay sesyon pa ankor komanse, ki mannyer ou kapab annan en pwen pou fer? Mon pa war. Ki ou pwen?

HON SEBASTIEN PILLAY

Non Mr Speaker. Napa okenn problem.

MR SPEAKER

Ok.

HON SEBASTIEN PILLAY

Mon pe zis soumet rapor avek ou pou...

MR SPEAKER

Mersi. Ou war ler ou lev ou Lanmen, mon Mazinen poudir i enn bann problem *point of order*. Mersi bokou. Ou ava atann Madanm raporter i ava al kolekte sa silvouple.

Bon, avan nou komanse Madanm raporter ou ava pran rapor avek Onorab Pillay. Mersi. Bon, nou a retourn lo kestyon.

Bonzour Minis pou Lenvestisman, Lantreprenarya e Lendistri Mrs Devika Vidot. E bonzour Ms Lautoy *CEO Enterprise Seychelles Agency* e egalman Ms Lynn Rouillon *Human Resources and Budget Management Officer* dan sa Minister. Mersi pou zot partisipasyon dan kestyon.

Nou komans avek nou lalis kestyon. E limero 222, kestyon dan non Onorab Woodcock pou ganny demande par Onorab Porice dan son plas.

HON DOYACE PORICE

Mersi Mr Speaker. Mr Speaker, Minis ek ou delegasyon ek tou mon bann koleg Onorab bonzour. Kestyon 222 pou Onorab Woodcock, Manm Elekte pou Grand Anse Praslin i lir koumsa; -

Eski Minis i kapab enform Lasanble kan ki proze devlopman sit Amitie vizavi *Airport* pou konmanse e ki bann devlopman ki pou annan dan sa landrwa? Mersi.

MR SPEAKER

Mersi Onorab. Minis, pou repons silvouple.

MINISTER DEVIKA VIDOT

Mersi Mr Speaker. Bonzour Mr Speaker. Bonzour tou bann Manm Onorab e tou dimoun ki a lekout.

Pou komanse, mon ti ava kontan remersye Onorab Woodcock Mr Speaker, pou sa linisyativ ki in montre e asiste nou konsevwar en proze lo sa sit Amitie. Mon konnen ki sa i en proze ki vremen pros avek son leker aköz i pou benefisyè bann dimoun Praslin- bann zabitan Praslin. Sirtou Grand Anse Praslin.

Bon, *Cabinet* ti aprouv sa proze an Mars pli boner sa lannen e proze i espekte komanse apre ki prosedir later i konplete. An se moman *subdivision* pe ganny fer par Departman Later e nou espere ki sa i ava ganny konplete avan lafen lannen.

I enportan e i nesese ki *survey* i fini ganny fer pou ki *SIA* i kapab fer son plan lenfrastruktir. Apre sa, byensir Gouvernman i ava demar avek sa proze lenfrastruktir li

menm. An menm moman- e sa an kolaborasyon avek *SIB* i ava kapab lans lekspresyon lentere pou bann biznes ki anvi partisip dan sa proze.

Mr Speaker, bann devlopman ki nou'n propoze dan *master plan* i avek bi fer sa landrwa vin en pti vilaz rekreasyonnel avek en eleman touristik e kiltirel.

Bann aktivite ki pe ganny propoze i enkli restoran. mwayenn 2 *kiosk* manze, bann *kiosk* artizanal. En *kiosk* pou bann rafresisman ouswa pou *ice cream, slush, pop corn* bann keksoz pou zanfan.

En pti galeri pou lar, en *open air bar* kot i ava annan en *decking* kot dimoun i kapab asize. E osi en *stage* pou bann *show* kiltirel. Fasilite *shower* e *toalet* e fasilite *parking*. Mersi.

MR SPEAKER

Mersi Minis. Onorab Porice ou annan siplemanter?

HON DOYACE PORICE

Minis mersi. Pou sa repons byen detaye. Minis konbyen sa proze pou koute si ou annan avek ou *please*?

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Onorab, pou le moman akoz nou ankor pe esper travay *survey* fini

ganny fer. E *SIA* i bezwen tou sa bann lenformasyon pou zot kapab travay lo en kou. Mersi.

MR SPEAKER

Mersi Minis. Onorab Henrie?

HON GERVAIS HENRIE

Mersi Mr Speaker. Bonzour tou dimoun. Minis dan son larepons Mr Speaker in fer referans avek travay *survey*.

An vi defi ki nou konnen ki annan pou kapab fer *survey* dan en letan rezonnab ozordi ki egziste atraver Minister Later, eski alor Minis i annan en lide kan zisteman ki *timeline* pou sa zafer *survey*, e ki alor sa proze i pa ava al osi tarde ki zot antisipe? Mersi.

MR SPEAKER

Mersi. Minis?

MINISTER DEVIKA VIDOT

Mersi Mr Speaker. Onorab, parey mon'n fer resorti nou prozeksyon se ki *survey* i ava kapab konplete avan ki lannen i fini. Nou pe fer bokou swivi avek en departman *survey* e zot in pran sa koman en proze ki enportan e en proze priyorite. Mersi.

MR SPEAKER

Mersi Minis. Nou ava avans lo prosen kestyon. 223 egalman dan non Onorab Woodcock. Onorab Porice i ava poz son kestyon.

HON DOYACE PORICE

Mersi Mr Speaker. Eski Minis i kapab donn Lasanble detay lo sa proze *Micro Enterprise Centre* kot vye *STC-Warehouse* obor lekòl Grand Anse Praslin Primer, e kan ki sa proze pou komanse e sipoze konplete? Mersi.

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Apre en pe ale vini Onorab nou'n ganny laprouvasyon pou sa Sant Mikro Antrepriz mwan pase le 25 Septanm.

An se moman *SIA* pe travay lo plan feray ansanm avek *bill of quantities*. Prosedir *tender* i sipoze ganny fer an Novanm e lenplimantasyon i sipoze ganny fer lannen prosenn. I sipoze pran environ 7 mwan pou konplete. Sa sant li menm i sipoze fer lespas pou environ 5 lakwizin komersyal ouswa bann latelye *manufacturing*.

Anviron 7 lespas pou latelye artizanal ouswa kiltir ou menm koud, 2 lespas pou bann latelye kot bann aktivite reparasyon miner i kapab ganny antreprann e en lespas pou lofis. Mersi.

MR SPEAKER

Mersi Minis. Onorab Porice, ou annan siplemanter?

HON DOYACE PORICE

Mersi Mr Speaker. Minis, mersi. Mersi pou sa detay ki ou'n donn nou. Eski sa sit in deza pe komans demoli e ankor i pe demande konbyen pou koute. Mersi.

MR SPEAKER

Mersi. Minis.

MINISTER DEVIKA VIDOT

Mersi Mr Speaker. Sit pou le moman pa ankor ganny demoli e zisteman akòz bann prosedir *tender* i bezwen ganny fer dabor.

Bidze ki nou pe propoze pou sa batiman i pou environ 2.9 milyon. Mersi.

MR SPEAKER

Thank you. Nou ava don laparòl Onorab Cosgrow pou son kestyon.

HON WALLACE COSGROW

Mersi Mr Speaker. Mr Speaker, mon premye parti kestyon ki mon ti pou demande, konbyen apepre zot ti pe bidzete pou sa proze, mon krwar in fini ganny reponn.

Me petet mon ava kapab demann Minis, eski zot annan Bidze fini *allocate* pou sa proze, ouswa zot anvizaze bidzet li dan Bidze lannen prosenn? Mersi.

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Onorab, dan Bidze pou 2025, nou'n fer provizyon pou sa proze. Mersi.

MR SPEAKER

Thank you. Onorab Roucou, ou kestyon.

HON MICHEL ROUCOU

Mersi. Minis, *regarding* sa proze la, eski i annan travay ki'n deza komans fer pou zot konn kantite ou kapab dir Pralinwa ki enterese pou ganny en lespas dan sa *building* li menm li? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Onorab, letan nou ti pe konsevwar sa proze konsep, tou sa ban konsiltasyon ti ganny fer avek Lotorite Distrik avek Biro MNA.

So nou'n fer en konsep baze lo demann ki zot in met devan e osi nou'n fer referans avek lalis demann osi ki bann manm piblik i mete kot IEA. Mersi.

MR SPEAKER

Mersi Minis. Nou ava avans lo kestyon 224, Onorab Churchill Gill.

HON CHURCHILL GILL

Mersi Mr Speaker. *Bonjour panel.* *Bonjour* tou dimoun a lekout. Kestyon i lir koumsa; -

Eski Minis i kapab enform Lasanble kan ki nouvo *tender* i ekspekte ganny *advertise*, pou ki sa bann dimoun ki'n fer laplikasyon later lo *Zil Eve* ki ankor pe esper *tender* a kapab partisipe vi ki i annan dimoun ki'n fini pare pou lans dan zot biznes? Mersi Mr Speaker.

MR SPEAKER

Mersi Onorab. Minis, ou repons.

MINISTER DEVIKA VIDOT

Mersi Mr Speaker. Onorab, parey ou okouran dernyen *tender* lo Zil Eve ti ganny fer pa bokou letan pase, dan anviron 50 bout later ki nou ti met lo *tender* anviron zis lanmwatye, ki bann dimoun ti vin devan e met lentere.

E parey ou kapab konstate Onorab, i koute, i pran bokou resours e letan pou kapab fer en *tender*. Se pour sa rezon ki IEA in plito konsantre resours lo lezot proze ki ti dan son plan. E pour refer *tender*, nou'n planifye li pou trwazyenm kar sa lannen ki la.

Malgre tou nou annan plezir pou fer resorti ki prosedir i anmars, preparasyon *site* pe ganny fer e pa pou swiv par *mapping* e

tou bann demarkasyon neser pou fer sir ki nou pe idantifye bann *plots* ki pou al dan sa *tender*.

An gro, apre ki tou sa travay in ganny fer nou ekspekte lans *tender* par la lafen Novanm 2024. Mersi.

MR SPEAKER

Onorab Gill, siplemanter.

HON CHURCHILL GILL

Mersi Mr Speaker. Premye siplemanter. Pou sa bann lespas ki'n reste apre premye *tender*, pour ki bann kalite poze ki pou posib ler pou lans sa *tender* baze lo sa bann lespas ki reste?

E dezyenm keston, ou ti'n deza montre nou *microenterprise* pou Zil Eve osi. Me selman la mon vwar ki napa mansyon lo la e priyorite in donn pou Grand Anse Praslin.

Si petet dimoun Baie Sainte Anne ki ti lo lalis zot osi pou *microenterprise* pou kapab donn zot en nide kan ki zot, zot espekte pou Baie Sainte Anne komanse? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Onorab, bann kalite aktivite ki lo *land use* pou Zil Eve i konpri *manufacturing*, *processing*,

konstriksyon eksetera. E plito tou bann aktivite i anliny avek bann aktivite endistriyel.

Savedir i annan deza en plan kot bann morso later in ganny idantifye dapre *land use*. E sa i parey letan nou ti lans li premye fwa. Byensir i ava annan en pe lazisteman, me selman an gro, pou napa gran sanzman.

Kot difikilte in vini pou nou kapab zis relans, ouswa zis servi bann menm kare later pou nou re al lo en *tender*, problem in vin akoz *design* ki lle Eve in gannyen pou son bann servis, in vin a en moman bokou pli tar ki bann later ti'n ganny en *survey*.

E sa i fer ki i annan bann morso later kot bann servis in pas atraver sa bann later. Savedir i annan serten later ki i annan kab elektrisite ki pas atraver, ouswa i annan tiyo ki pas atraver. Rezon pou sa set akoz later in ganny donner avek dimoun avan ki *en proper design* servis ti ganny fer pou sa zil.

La ki nou'n ganny *design*, *SIA* i pou bezwen *map* tou sa bann servis lo zil e antreprann louvraz avek *PUC* pou *divert* bann servis ki i ava fer ki letan nou al lo *tender* pou bann bout later, bann dimoun letan zot ganny zot later zot ava napa sa lenkonvenyans ki letan zot komans devlope zot fer fas

avek kab ouswa tiyo ki pe pas atraver zot later.

E sa i osi aport en eleman risk, akoz i kapab anmenn en danze pou zot, espesyalman an sa ki konsern bann kab elektrisite. So, i vreman enportan ki nou fer sa byen. Mersi.

Dezyenm kestyon, eskize Mr Speaker. An relasyon avek Sant Mikro Antrepriz pou- lo Zil Eve. Lefe ki lo Grand Anse Praslin alokasyon bidzeter in ganny fer pou nou fer en Sant Mikro Antrepriz Grand Anse mon ekspekte ki Praslin tou dimoun i Praslin, Baie Sainte Anne, Grand Anse i pa vreman lwen.

So i pa pou- sa proze i pa pou zis vize ver zabitan Grand Anse Praslin. So sa ki vin devan, sa ki annan- kot loportinite i annan zot ava kapab partisipe. Mersi.

MR SPEAKER

Oule en klarifikasyon Onorab? Wi.

HON CHURCHILL GILL

Wi. Mersi pou larepons. Me selman pou kote Grand Anse, rezon ki mon'n demann sa se akoz kantite lespas ki pou *available* ler sa *microenterprise* Grand Anse in fini.

Akoz si sa *availability* i ase limite, *then* i pou en konvenyans pou lezot dimoun ki pou bezwen esper ankor. Se

pou sa rezon ki nou ti oule en leklersisman, si apre sa enn sa enn ki ti'n propoze pou Baie Sainte Anne pou kontinyen oubyen si pou le moman pou annan zis sa enn Grand Anse e apre pli tar ki pou gete si Baie Sainte Anne pou fer?

Apre lo mon kestyon ki mon ti pou demann ou bann kalite ki reste apre premye *tender*. Akoz i annan bann dimoun ki osi pe espekte partisip dan *tender* pou bann travay marin, oubyen bann lagrandisman peser kot zot pou met prodwir azoute.

Se pour sa rezon ki mon pe gete si dan sa dezyenm *tender* sa kalite lespas i ankor *available*? Mersi.

MR SPEAKER

Mersi. Minis, ou anvi azout lo sa 2 repons?

MINISTER DEVIKA VIDOT

Mersi Mr Speaker. Onorab, an vi kontrent bidzeter i pa posib pou nou kapab fer tou proze an menm tan. Dan Bidze ki nou pe propoze i annan bann alokasyon ki nou anvi fer pou serten sant mikro antrepriz alor sakenn i bezwen esper son trou.

Sa sit ki nou ti'n idantifye o komansman pou fer sant mikro antrepriz lo Zil Eve, nou'n bezwen met- fer en lot propozisyon pou sa sit parske Praslin i bezwen en *STP*, e alor

nou'n fer sa konpromi avek *PUC* pour ki Praslin i kapab benefisye avek en *STP*.

E byensir lo Zil Eve osi letan tou devlopman pou pe demare, i pou enposib pou zot kapab *manage* sa bann demann. Alor i esansyel ki *STP* i ganny met an plas. So sa in pran priyorite.

Savedir pou mon konklir Mr Speaker, se nou bezwen zis espere pou nou kapab ganny ne lespas pou nou kapab fer plis devlopman pou Praslin.

An sa ki konsern bann bout later, eski- wi, *marine related* se sa nou pou bezwen atann pou vwar kwa ki annan *available* letan *tender* i ava ganny lanse, ou ava annan tou sa bann lenformasyon. Mersi.

MR SPEAKER

Mersi Minis. Nou a pran kestyon Onorab Cosgrow.

HON WALLACE COSGROW

Mersi Mr Speaker. Minis, an vi ki mon war i annan bokou lentere lo sa zafer mikro antrepriz, Grand Anse aparaman ou pou ganny enn. Baie Sainte Anne pe demann enn. Mon'n war par lao dan bann kestyon Onorab Woodcock, konsernan mikro antrepriz ankor, eski ou kapab donn nou en lendikasyon konbyen sa bann fasilite zot in konstrir, pandan sa dernyen 4an la ki *LDS* pe al

selebre son katriyenm lannen o pouvwar. Konbyen ki zot in konstrir pandan sa bann dernyen 4 an, sirtou anba sa *fame One District, One Project?* Mr Speaker Mersi.

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Pou le moman nou pa ankor fini konstrir okenn sant mikro antrepriz. Me nou'n met tou nou bann plan dan Bidze.

Parey ou pou konstate Onorab e parey byensir ou konnen dan tou bann diskisyon bidzeter i annan limitasyon e i annan serten proze ki'n bezwen ganny priyorite. E nou travay ansanm ek Minister Finans, letan i annan lespas fiskal nou fer antre nou bann plan, parey tou Minister i annan zot priyorite.

Nou osi nou travay avek Minister Finans pou nou kapab realiz nou bann proze. Mersi.

MR SPEAKER

Mersi Minis. Onorab Pillay, ou kestyon.

HON SEBASTIEN PILLAY

Mersi Mr Speaker. Mr Speaker, Minis in dir a 2 repriz ki nou pou bezwen esper en pe letan. So ler Minis pe koz nou

lo en pe letan, ki lasistans i kapab donn nou vizavi letan *regarding* sa size spesifik?

Oubyen eski i annan lezot opsyon ki pou ofer bann dimoun ki pe zisteman esper sa sant mikro antrepriz? Akoz *a débuts* zot in dir nou pou bezwen esper en pe letan, so mon ti a kontan konpran ki kantite letan egzakteman ki ou pe koz lo la vizavi program ki ou Minister i annan? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Mon ti a kontan demann Onorab klarifikasyon lo ki proze egzakteman i pe fer referans avek? Mersi.

MR SPEAKER

Onorab, si ou kapab klarifye. Wi.

HON SEBASTIEN PILLAY

Mersi Mr Speaker. Ler ou'n reponn siplemanter Onorab Gill, ou'n eksplik li bann kontrent ki zot pe gannyen. E in fer referans avek proze kestyon oparavan, ki mon pa oule retourn dan en larepons ki'n fini donner.

E ou ti koz lo lefe ki zot pe esper en pe letan pou zot konnen ki kantite egzakteman ki zot pou annan. So mwan mon kestyon i al spesifikman

lo la. Pour ki nou kapab ganny *either* en lasirans avek ou koman Minis, oubyen en- si oule en lesplikasyon pli larz pou ki bann dimoun Ki pe ekoute i ava konnen *within which timeframe* ki pou annan en keksoz *available*?

E zot a met zot pare zisteman pou zot kapab *bid or tender*. Prenon kont ki ou ti annan problem, par egzamp- pa problem me ti annan konsern letan bann *tenders* ti vini pou Ile Eve pa sa kantite dimoun ki ti vini. Se sa ki mon pe sey klarifye Mr Speaker. Mersi.

MR SPEAKER

Mersi Onorab. Minis, ou kapab klarifye?

MINISTER DEVIKA VIDOT

Mersi Mr Speaker. Sa ki mon kapab konfirman e Onorab i pou vwar letan Bidze i ganny propoze devan Lasanble Nasyonal, ki proze pou Baie Sainte Anne Praslin i pa'n ganny lespas dan sa Bidze 2025 a 2027.

Parey ou okouran Onorab, Minister Finans i fer son prozeksyon pou 3 an, so sa i pa pe *feature* pou le moman dan sa Bidze. Si an ka i ava annan lespas fiskal, lannen prosenn ouswa *in the following year, then* Minister Finans i ava kapab konsidere.

Me avek sa Mr Speaker, mon oule fer resorti ki avek bann nouvo devlopman ki pe arive lo Zil Eve, e kot deza i annan par egzanp lo sa bann dernyen moman 25 bout later ki'n ganny *allocate* e i annan bann lezot avan ki ti deza ganny devlope malgre ti minim.

Me nou espekte ki i ava pe fer provizyon lespas, pou bann dimoun ki zot napa mwayen pou devlop later, zot ava ganny en posibilite pou zot *rent* lespas, avek bann ki'n devlop zot propriyete. Mersi.

MR SPEAKER

Mersi Minis. Mon annan kestyon Onorab Loizeau.

HON NORBERT LOIZEAU

Mersi Mr Speaker. Bonzour Minis, ek ou delegasyon. Mr Speaker, wi, nou pe al selebre 4 an dan Gouvernman. E pandan sa 4 an nou- mon apresye Minis ki ou pe met lord dan bann dezord ki ti annan lo later endistriyel kot in ganny partaze ek dalon avan sa.

Kot ozordi nou bann pti antrepriz pe ganny difikilte pou ganny en bout. Akoz later bann gro, gro imsyen in fini ganny pran. Minis alors mon kestyon mwan, vi ki ti annan sa dezord. E ler koman COGA nou ti la vizit Ile Eve nou ti vwar ki ti annan en dezord

total kot Zil Eve. Eski Minis zot in fini met lord dan sa dezord?

E eski aprezan si pou annan alokasyon ki pou fer avek sa bann pti antrepriz, eski i pa pou parey Providence? Toultan mon demann sa kestyon. Kot tou biznes i eparpiye ansanm, en garaz mekanisyen i obor en *take away* lot, lot, lot.

Eski sa pou ganny separe pour ki tou biznes ava annan en seksyon ki zot pou ete lo Zil Eve, kot ler dimoun pe vin kot sa biznes i a konnen ki seksyon ki annan tel, tel, tel biznes ki pou *operate*? Mersi.

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Onorab, an relasyon avek dezyenm parti ou kestyon. Wi, sa voyaz avan nou ti fer- nou ti lans nou premye *tender* nou ti fer sir poudir i annan en *land use plan* pou Zil Eve.

Savedir an se moman i annan en segregasyon, i sipoze annan en segregasyon bann aktivite pou fer sir ki napa sa bann konfli avek bann aktivite. So sa i en lord ki nou'n bezwen mete definitivman.

Dezyenmman, si ou pe koz dezord. Rezon akoz ki faz 1 Proze Lenfrastriktir lo Zil Eve in tarde set akoz dezord.

Prensipalman, parey mon'n eksplik Onorab Gill lefe ki ti napa en plan- en *design* pou bann servis lo Zil Eve, letan en dimoun in ganny donn later in fer son demann pou elektrisite, pou delo.

E la *PUC* in vini in donn li koneksyon san en *proper plan*. E ki fer ki ozordi letan kontrakter pe sey tras semen, fer bann *crossings* koman zot fouye zot bat avek en kab elektrisite, ouswa zot bat avek en tiyo.

E la tou travay i bezwen arete, *PUC* i bezwen antre, re pozisyon kab pour ki kontrakter i kapab fini fer travay. So nou pe kontinyen avek met lord. Mersi.

MR SPEAKER

Mersi Minis. Nou a pas lo prosen kestyon 225, Onorab Egbert Aglae.

HON EGBERT AGLAE

Mersi Mr Speaker. Mon a dir bonzour Minis, *CEO* ek lot *panel*. Minis kestyon i *comme swivan*; -

An vi ki lagreman sa bann *tenants* ki pe okip *ex-Mahe Beach Kiosk* in ganny *extend* ziska *Desanm 2024*, ki pou arive ek zot apre? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Mr Speaker, parey pli boner sa lannen letan mon ti vin donn repons Lasanble an relasyon avek sa kestyon, mon anvi ankor enn fwa fer rapel ki sif Fon Pansyon ki'n pran lamenzman sa propriyete Port Glaud.

E sa bann *tenants* i nepli anba responsabilite *ESA*, me zot plito trou- zot plito aprezan bann kliyan Fon Pansyon. Me dapre nou konversasyon ki nou'n annan avek Fon Pansyon, nou'n kapab determinen ki i annan selman 3 parmi sa 6 biznes ki'n montre lentere pou zot vin en *tenant* Fon Pansyon.

Alors sa 3 in ganny lagreman. E parey ou'n fer resorti Onorab in ganny *extend* ziska *Desanm*. I enportan fer resorti osi ki sa batiman i ankor lo plan Fon Pansyon pou vann. Antretan i annan serten travay renovasyon imedya ki bezwen ganny antreprann lo serten parti sa batiman. E sa pe al demare byento.

Fon Pansyon in dir ki zot in kominik avek bann *tenants* e zot napa gran lobzeksyon pou renouvle *lease* ziska ler in arive pou antre dan prosedir vann propriyete. E la Fon Pansyon in dir ki bann *tenants* pou ganny sifizaman notis e zot pou ganny enformen lo

bann plan ki ava swiv. Mersi bokou.

MR SPEAKER

Oule klarifikasyon Onorab?

HON EGBERT AGLAE

Minis, mersi pou ou larepons. An vi lensertitid ki pa garanti pou bann ki pe deza *operate* dan sa landrwa. E osi ou'n fer resorti ki wi, Fon Pansyon ki pe zwer lamenzman akoz in retourn *back* avek li, eski dan diskisyon ki vi ki ou ki responsab lenvestisman ek bann pti antreprenner, eski in annan en diskisyon ki posibilite ki okenn bann endividi ki dan sa landrwa zot kapab zot menm aste sa landrwa? Sa i enn.

Dezyenmman, an vi - mon pa anvi fer spekilasyon lo sa size, an vi ki nou war ki Fon Pansyon li menm li in- pe sorti dan bann *Real Estate Development* dan en sans akoz zot in vann plizyer zot bann *asset* ki dan *Real Estate*, eski in annan en diskisyon an vi ki i sipoze osi annan en redevlopman dan sa landrwa kot *ex-Mahe Beach*, ki sa propriyete i enn ki'n met a ou latansyon ki i annan lentere avek en devloper a lavenir, pou kapab ganny sa landrwa osi pou zot fer zot ekspansyon ouswa zot ekstansyon dan zot proze a lavenir? Mersi.

MR SPEAKER

Mersi. Bon, ou'n al dan en lot domenn. Me vi ki letan i favorab, Minis ou kapab eklersi dapre lenformasyon ki ou annan.

MINISTER DEVIKA VIDOT

Mersi Mr Speaker. Mon kapab abord dernyen parti kestyon, larepons se non, mon pa okouran okenn plan.

An relasyon avek Fon Pansyon e lafason ki i pe fer lamenzman son ban propriyete, Mr Speaker, sa mon krwar tou dimoun i ava kapab aksepte poudir sa i tonm dan responsabilite Fon Pansyon e mon pa pou kapab fer okenn komanter lo lapar Fon Pansyon.

An relasyon avek lentere ki bann *tenants* si zot annan, zot kapab met devan, Fon Pansyon in enform nou poudir sa i en konversasyon ki zot in fer avek sa bann *tenants* dan bann *meeting* ki zot in annan avek zot. E bann *tenants* in ganny ankouraze pou zot zwenn ansanm si zot anvi.

E Fon Pansyon i pare pou donn zot en *right of refusal* letan zot pe al vann propriyete. Me selman byensir i ava annan lezot kondisyon, term e kondisyon ki zot pou bezwen adere. E si tou keksoz i mars dan en fason favorab, zot ava kapab ganny konsidere. Mersi.

MR SPEAKER

Mersi. Onorab, ou'n demann kestyon, ou'n demann klarifikasyon, ou'n al dan en lot kestyon. Eski ou asir mon poudir i en klarifikasyon ki ou pe al fer? Ale. Klarifikasyon.

HON EGBERT AGLAE

Wi, en klarifikasyon Mr Speaker. An vi ki mon'n dir parey Minis ki reprezant Lantrepriz; si okenn sa bann demars parey i pe dir i pa marse.

Eski petet lo kote Minister petet zot pe ma- lo kote ou departman zot pe mazin *offer* a lavenir lezot landrwa ki si sa bann dimoun i enterese pou zot bouze si Fon Pansyon i deside lev li vann ek en lot dimoun, ki pe enterese dan sa laliny biznes ki i ladan ozordi?

MR SPEAKER

Ok, mersi. Minis?

MINISTER DEVIKA VIDOT

Mersi Mr Speaker. Mr Speaker, i annan en responsabilite tou kou ki tonm lo Gouvernman, ki'n mon vwar sa i pa ganny aplike *across the board*.

Letan en propriyete prive pe ganny demoli ouswa pe fer renovasyon, napa personn ki met personn otaz pou dir ki sa propriyete i bezwen fer sir i ganny en lot lespas pou kapab

donn sa bann dimoun avan. So i annan en serten lobligasyon ki mon krwar parfwa politisyen, pou serten *mileage* politik zot kontan servi pou zot fer sa, me i pa byen, i pa byen.

Mon krwar –

(comments off-mic)

MINISTER DEVIKA VIDOT

(mon kapab fini?) - *ok*, mon krwar sa bann dimoun, si keksoz i ganny fer byen dan lord, prosedir i ganny swiv, notis i ganny donner, zot ganny averti, zot ganny ase dele letan, *then* zot koman bann biznes mon konnen i pou annan bann posibilite ki i kapab ganny ouver pou zot. Mersi.

MR SPEAKER

Mersi. Onorab, ou a bezwen satisfè avek sa la? Onorab Pilay ou annan en kestyon?

HON SEBASTIEN PILLAY

Wi Mr Speaker. Mr Speaker, zis mon oule zis dir Minis. Be ler li i dir tou keksoz pa bon dan lepase, i pa pe rod *mileage* politik li, zis nou, zis lezot dimoun ki pe rod *mileage* politik? *Come on*. Kestyon o ganny demande nou reponn. *So going back to...*

MR SPEAKER

Annou ale. Demann ou kestyon prezan.

HON SEBASTIEN PILLAY

Mr Speaker, Onorab Larue ki Speaker dan sa Lasanble oubyen ou?

MR SPEAKER

Ale demann ou kestyon.

MR SPEAKER

Annou ale. Demann ou kestyon prezan.

HON SEBASTIEN PILLAY

Annou ganny li kler, non? Kestyon pou Minis i senp Mr Speaker. Ou Minis ki responsab pou Lantreprenarya. Sa bann dimoun pe fer *entrepreneurship*.

I vre ki Fon Pansyon ki propriyeter sa landrwa. Alors idealman diskisyon i devret *between* sa bann dimoun ek Fon Pansyon. Me *that's* lobligasyon ki en Gouvernman i pran ler ou vin la, ou bezwen debout akote sa bann dimoun ki pe rod sa.

So, eski ou Minister li vi ki Fon Pansyon pe dir ek sa bann dimoun organiz zot e angaz li *as part of* zot louvraz promosyon pou ed sa bann dimoun pou organiz zot koman en lasosyasyon oubyen koman en group, zisteman pou zot kapab debat sa size avek Fon Pansyon.

Akoz nou, nou oule konnen kote Minister Lantreprenarya i debout an relasyon avek defann antreprenner. Akoz par egzanp lo lans nou war pe kas tou zot *kiosk*. Si zot al fer en pti biznes an deor zot pa kapab fer, si zis pou satisfere sa ki Arab i oule fer i *ok*. Selman mon annan en problem la mwan.

MR SPEAKER

Ok. Ou'n poz-

HON SEBASTIEN PILLAY

Mwan mon annan en problem ek sa mwan, mon annan en problem.

MR SPEAKER

Onorab! Ou'n demann ou kestyon e apre sa ou'n al dan lot size. So ou a konpran, mon a permet Minis reponn ou premye kestyon e nou a termin la. Minis, si ou annan en repons.

MINISTER DEVIKA VIDOT

Mersi Mr Speaker. Mr Speaker letan bann *tenants* ti tonm direkteman anba lamenzman *ESA*, *ESA* in fer bann diskisyon nesese avek zot. Me ou kapab, nou bezwen apresye osi poudir sa bann dimoun lo zot kote zot osi zot annan zot responsabilite ki zot bout pou zot zwe.

So konversasyon in ganny fer Onorab. An relasyon

avek sa lot komantr ki Onorab pe fer an relasyon avek biznes, mon krwar mesaz kler in ganny fer resorti poudir i pa akoz nou pe fer biznes ki nou pou kapab vyol Lalwa. I annan regilasyon, i annan prosedir pou swiv.

E an relasyon avek Anse Royale, mon pa konnen si zot in vwar notis, me si zot pa'n vwar mon ava met a zot latansyon ki sa propriyeter i pe enplor bann parti politik pou pa servi son ka pou ganny *political mileage*.

So ou'n *raise* sa, e mon pe reponn ou. Mersi.

HON SEBASTIEN PILLAY

Mon pa pe koz lo Anse Royale mon pe koz lo Intendance. Mon pe koz lo Intendance. I annan 2 landrwa ki zot in kas *kiosk*, Intendance tou zot in kas *kiosk*.

(Interruptions)

MR SPEAKER

Order! Order! Minis, eski ou ti'n terminen? Mersi.

MINISTER DEVIKA VIDOT

Terminen Mr Speaker.

MR SPEAKER

Nou a pas lo kestyon limero 226 dan non Onorab Conrad Gabriel.

HON CONRAD GABRIEL

Mersi Mr Speaker. Bonzour tou dimoun a lekout. Bonzour Minis ek ou *panel*. Kestyon i lir koumsa; -

Eski Minis i kapab dir avek sa Lasanble ki zistans sa Proze *Marine & Auto Industrial Park* in arive? Mersi.

MR SPEAKER

Mersi Onorab. Minis.

MINISTER DEVIKA VIDOT

Mersi Mr Speaker. Onorab, sa proze *Marine & Auto Industrial Park* i an se moman dan prosedir *tender*. Apre evalyasyon ki ganny fer kontrakter a ganny swazir pou fer sa proze.

I bon fer resorti ki metod ouswa lafason ki sa proze pou ganny antreprann i *design and build*. So kontrakter ouswa sa devloper ki ganny selekte, i pou bezwen soumet en *design* e apre sa i ava kapab *build* sa sant mikro antrepriz.

Lafason ki sa *building* ouswa son konsep i pou plito en *warehouse* kot pou annan lespas pou en seri pti biznes mekanik ouswa *marine* mekanik. E tousala i ava kapab ganny fer lo en sel bout later. Mersi.

MR SPEAKER

Onorab Gabriel. Siplemanter?

HON CONRAD GABRIEL

Mersi Mr Speaker. Minis, eski pou annan okenn varyasyon dan lenplimantasyon sa proze? E kan sa proze pou finalman demare? Konbyen sa pou koute dan son totalite?

E zis an pasan Minis, i enportan fer remarke ki bann zenn, pti biznes pe ganny bokou difikilte an se moman e i pa paret ki Gouvernman i enterese. Nou'n war en *budget cut* 3 milyon dan *supplementary*. Zis silvouple annou donn en *deadline*, donn garanti sa bann zenn ki pe espere la ater. Mersi.

MR SPEAKER

Mersi. Minis, Minis ou repons.

MINISTER DEVIKA VIDOT

Mersi Mr Speaker. Eski pou annan varyasyon dan lenplimantasyon sa proze? Proze parey mon'n dir ou i dan prosedir *tender*. Proze pa ankor ganny enplimante.

An relasyon avek provizyon, parey avek nenport ki proze nou bezwen fer provizyon dan Bidze. Souvandfwa letan en proze pe al demare, i annan en *down payment* ki bezwen ganny fer e petet se pour sa rezon ki- e se sa ki Onorab pe fer referans avek.

An relasyon avek konstrir sa sant li menm, aköz i en sant ki posibleman i pou napa bokou eleman teknik, se

sa ki *SIA* in averti mwan. Alor pou nou kapab vreman enplimante e pou sa proze realize, i pa sipoze pran bokou letan. Savedir nou pe regard parla dan lafen lannen prosenn nou pou'n kapab annan sa batiman fini pare. Mersi.

MR SPEAKER

Ok, mersi Minis. Onorab Vidot, ou kestyon.

HON AUDREY VIDOT

Mersi Mr Speaker. Mon kestyon pou Minis. Minis, eski ou kapab dir nou, si zot kapab konfirmen petet konbyen *unit* i pou annan dan sa *warehouse*?

Pou nou kapab ganny en nide konbyen bann dimoun pou benefisye. E si zot in fini annan serten kriter ki zot in komans met an plas ki letan sa proze i konplete ki fason ki mannyer zot pou fer bann alokasyon? Mersi.

MR SPEAKER

Mersi Onorab. Minis, repons?

MINISTER DEVIKA VIDOT

Mersi Mr Speaker. Onorab, i sipoze annan anviron 12 a 14 *unit* an total dan sa proze. E kriter ki *IEA* pou ankor travay lo la byensir nou pa ankor lans *tender*. Me selman kriter ki zot pe travay lo la e i pou vin an relasyon avek regard bann dimoun espesyalman ki pa

bezwen gran lespas pou li *operate*.

E ki i ava kapab. E ki son skil looperasyon i pa sitan gro ki i bezwen layter, me plito ki i bezwen en pti lespas. I osi annan bann ki zot in ganny serten notis dan zot landrwa rezidansyel kot zot pe *operate* deza. So sa osi i pou en eleman ki pou ganny konsidere letan bann evalyasyon sa bann laplikasyon pou ganny fer. Mersi.

MR SPEAKER

Mersi. Onorab Pillay, ou ti'n lev lanmen? Ou ankor annan en kestyon Onorab? Mon pe donn ou laparol pou ou demann en kestyon rezonnab. Si ou fer parey labitid ou al dan bann size, mon pe aret sa kestyon lanmenm la. Onorab, ou kestyon.

HON SEBASTIEN PILLAY

Mersi Mr Speaker. Mr Speaker, mon ti a kontan ki Minis i klarifye pou nou. Ler Bidze ti pase an 2024, Bidze 2024, ti annan en provizyon R5 milyon ki ti'n ganny mete pou sa proze. Savedir nou pe pran kont ki sa proze pou komans 2024.

Now, Minis in dir nou poudir i annan bann diferan keksoz ki pe *go on around* sa proze, nou konpran tou proze i pas ladan. Me sa ki nou, nou konnen ki i annan en larzan ki

ti'n bidzete pou sa proze R5 milyon.

Onorab in demann li en kestyon vizavi *budget cut* e li in dir Onorab pe fer referans avek bann varyasyon ki arive dan Bidze. So kestyon pou Minis i sa; eski i pe dir avek nou poudir sa larzan R5 milyon ki pou sa proze la, pa pe al ganny servi pou sa proze e ki pou annan en lot?

Akoz in dir *next year* ki i pou komanse, pou annan en lot provizyon bidzeter aköz napa provizyon bidzeter for 2025 *forecast* pou sa proze.

So mwan mon oule etabli lekel larzan ki pe ganny servi pou sa proze egzaktman si sa 5 milyon ki la, oubyen si pou annan larzan lannen prosenn, oubyen si pou annan en *suspense account* ki larzan pou *roll over*?

Zis pou nou kapab dir poudir nou *follow up* i annan en lasirans ki'n ganny donner ek Lasanble, apre pou pa blanm Onorab Lemiel ler i dir dan 400 zot in fer zis 13 lasirans. Mersi Mr Speaker.

MR SPEAKER

Mersi Onorab. Minis, repons.

MINISTER DEVIKA VIDOT

Mersi Mr Speaker. Onorab, wi provizyon ti ganny fer dan Bidze pou 2024. E in annan serten retar lo lapar SIA ki zot pa- i pa'n posib pou zot lans sa

tender, letan ki zot ti pe- ki zot ti ava voudre.

Nou bezwen konstate ki i annan lanmwatye lannen ki SIA in ganny angaze avek Cascade. So byensir tou nou bann lezot proze kapital in ganny afekte akoz sa, sa i en konsiderasyon.

Dezyenmman, dezyenmman lefe ki sa proze i enn ki i pa- i pa bann proze tradisyonnell in en kantite ale vini avek *procurement Oversight Unit or National Tender Board* pou fer sir poudir zot satisfè avek sa dokimantasyon. Ki mannyer proze pe al ganny fer.

An plis ki sa, ti annan en pe retar lo relasyon avek later kot sa proze pou al ganny fer. So sa i en pti pe an rezilta, me sa ki mon kapab garanti se ki *National Tender Board* pa pou aksepte met en proze lo *tender*, si zot pa satisfè poudir ou annan fon pou ou kapab fer sa proze.

E, lefe ki sa proze i an sa moman lo *tender*, i donn ou sa garanti poudir zot in satisfè zot lekor ki i annan fon pou kapab fer sa proze.

Mon pa ti pe fer referans-zis pou mon koriz ou, letan mon'n reponn Onorab - mon pa'n dir li poudir proze- zot in demann mwan an relasyon ek varyasyon. Sa ki mon ti pe dir li se ki sa revizyon dan Bidze 2024 sa alokasyon i

probableman pou atase avek sa *down payment* ki pou bezwen ganny fer lo proze. Mersi Mr Speaker

MR SPEAKER

Mersi. Minis in reponn sa kestyon an plen. Nou a pas lo kestyon 227, Onorab Johan Loze. Onorab Loze.

HON JOHAN LOZE

Mersi Mr Speaker. Mr Speaker, eski Minis i kapab eksplik Lasanble, an relasyon avek sa sonm R279 milyon, 639 mil, 379 ki aparet dan Bidze siplemanter pou proze reklanmasyon, lekel sa investiser ki'n ganny sa proze? E si in *tender*, kan ti *tender*? Mersi Mr Speaker.

MR SPEAKER

Mersi Onorab. Minis, repons?

MINISTER DEVIKA VIDOT

Mersi Mr Speaker. Detay sa proze e son lenplimantasyon pou depan lo rezilta letid lanvironnman *EIA* ki pe ganny finalize. Provizyon dan Bidze Siplemanter ki'n ganny fer i atase avek kou pou fer bann konblaz ki pe ganny propoze anba sa proze.

An se moman nou ankor pe fer bann analiz teknik e *tender* pa ankor ganny fer. Antretan nou'n fer provizyon dan Bidze parey nenport ki proze Gouvernman i

antreprann. E si nou ganny tou laprouvasyon nesese nou pou lans *tender* e sa i ava ganny pibliye menm parey tou bann lezot proze. Mersi.

MR SPEAKER

Mersi. Siplemanter Onorab Loze?

HON JOHAN LOZE

Mersi Mr Speaker. Mr Speaker, rezon ki keston in ganny formile avek sa mo *tender* ladan, se ki letan ki premye fwa sa keston sa size ti ganny aborde avek Minis Rangasamy dan Lasanble.

Enn, nou ti ganny les konpran poudir sa larzan in sorti kot en lenvestiser.

Dezyenm se ki ler nou ti demann li, be ou'n fini ganny lenvestiser? I dir nou wi, in *tender*, sa ki'n *tender* in gannyen. E se sa rezon ki i lo verbatim Lasanble Minister se sa rezon e i ti egalman dir nou fodre si nou oule ganny detay fodre i demann avek Minis pou Lenvestisman.

So deza an relasyon ek sa sonm Minis, eski ou kapab konfirman ki i en larzan ki'n ganny bidzete sorti kot en lenvestiser ouswa i larzan Gouvernman sorti dan *Consolidated Fund* oubyen in sorti kot lenvestiser e in antre dan *Consolidated Fund*? Mersi Mr Speaker.

MR SPEAKER

Mersi. Minis, repons.

MINISTER DEVIKA VIDOT

Mersi Mr Speaker. Mon ava klarifye- donn klarifikasyon petet, i parey mwan i annan en pe konfizyon.

An relasyon avek sa proze, sa proze i konpri en proze konblaz ki Gouvernman pe al fer. E bi par deryer se fer plis lespas- fer plis later endistriyel pou nou kapab soutenir devlopman pou nou pei.

Akoz kou pou fer konblaz i vremen o, Gouvernman in bezwen vwar en fason pou nou kapab ganny en lot sours reveni, pou nou kapab kontinyelman *subsidise* kou sa proze.

E set an relasyon avek sa ki i annan en proze konblaz kot Aurore parey zot okouran, i annan parmi bann Manm Onorab ki ti dan bann *meetings* - Aurore i annan en proze pou konble e se sa ki nou pe donn posibilite en investiser.

Pou sa proze ki la, depi 2023, Zilyet 2023 le nesese ti ganny fer pou lans lekspresyon lentere. Nou ti anvi vwar eski i annan demann e nou ti ganny lentere e alors sa ti ed nou pou nou kapab formil lezot konponan nou proze.

So avek larzan ki nou pou gannyen atraver envestiser pou sa proze Aurore, nou pou kapab *offset* kou ki pou atase avek proze kot nou pou pe konble pli pre avek Providence. Mersi.

MR SPEAKER

En klarifikasyon Onorab? Silvouple reste lo klarifikasyon.

HON JOHAN LOZE

Wi Mr Speaker. Akoz prezan ki mon kestyon i aktyelman ganny reponn. Minis in aktyelman reponn en bout mon kestyon la ki *tender* ti ganny fer an Zilyet 2023, si mon pa tronpe.

Me ti annan zis en lot pti bout mon ti demande lekel ki'n ganny sa *tender*? Si Minis i kapab dir nou sa.

MR SPEAKER

Mersi. Minis ou kapab klarifye?

MINISTER DEVIKA VIDOT

Mersi Mr Speaker. Letan nou ti lans lekspresyon lentera ti annan anviron 3 lakonpanyen ki ti vin devan pou montre lentera.

Me selman finalman ti annan zis 2 ki ti kontinyen dan prosedir e i annan en lakonpanyen ki'n sorti favori dan evalyasyon e sa

lakonpanyen i apel *Ubiquiti*. Mersi.

MR SPEAKER

Mersi. Ou pa'n konpran son dernyen, Minis sa non.

MINISTER DEVIKA VIDOT

Ubiquiti.

MR SPEAKER

Thank you. Onorab Pillay, ou annan siplemanter?

HON SEBASTIEN PILLAY

Mersi Mr Speaker. Minis in servi sa mo konfizyon, petet i annan drwa servi mon pa ganny drwa, mon ti oule zis dir an pasan.

Mwan ki mon oule klarifye Mr Speaker. Nou'n ganny la en larepons sorti- 2 larepons sorti kot Minis Lendistri *basically*.

Premye kou in dir ek Onorab Loze pa'n *tender*, apre in dir nou i annan en lot bout ki'n *tender* e nou pe anmas larzan pou sa lot bout. Nou ankor pe anmas larzan pou sa lot bout me selman nou'n fini bidzet sa larzan pou ganny servi.

So nou pe sey ganny en konpran. *Now*, sa i en Minis *Senior* dan *Cabinet* sa. Prezan en dezyenm Minis *Senior* dan *Cabinet* sorti kot Departman Later, li i dir nou'n in fini *tender*, in fini donn- in fini

ganny sa larzan e larzan in fini anmase.

Prezan en trwazyenm Minis *Senior* ankor Minis Finans ler pe diskit deba pou Bidze Siplemanter, i vin dan Lasanble i dir nou zot pe *offset* sa larzan avek larzan ki zot in fini anmase. So nou'n ganny 3 versyon sorti kot *Cabinet* ki'n swadizan bezwen aprouv *the whole process*.

So Mr Speaker, nou ti a kontan demann Minis, an relasyon avek sa ki sa lakonpanyen in swadizan bezwen peye, konbyen sa konpanyen in pey Gouvernman Sesel pou sa lekspresyon lentere? Pou sa ki in sipoze gannyen, pou sa *tender*? Konbyen in sipoze donn Gouvernman Sesel? Silvouple Mr Speaker. Mersi.

MR SPEAKER

Mersi. Wi, selman mon a zis dir poudir mon- dan tou sa ki'n swiv la mon pa vreman krwar poudir i annan 3 versyon. Mon vwar sa bann- (permet mwan Onorab, permet mwan)-.

Mon krwar i annan en serten konsistans dan sa ki Minis pe dir, me selman mon a les li klarifye li menm kote nou ete. Minis?

MINISTER DEVIKA VIDOT

Mersi Mr Speaker. Mon dakor avek ou Mr Speaker. Me les

mwan esey klarifye ki ou pa konfiz ou lekor Onorab.

Ok so, tender ki'n ganny fer i an relasyon avek proze lenvestisman. *Tender* ki pa ankor ganny fer i an relasyon avek sa lakonpanyen ki li i pou bezwen fer sa konblaz. E mon'n komans larepons mon kestyon swa klarifikasyon taler pou dir ki sete Gouvernman ki pou pe fer konblaz. Se alor nou ki pou bezwen antreprann sa travay. Mersi.

HON SEBASTIEN PILLAY

Konbyen in gannyen Mr Speaker? Konbyen larzan in pey nou?

(comments off-mic)

MR SPEAKER

Mersi. Minis- Minis in reponn kestyon. Onorab Cosgrow ou annan en kestyon? Onorab Cosgrow ou annan en kestyon?

HON WALLACE COSGROW

Yes, mon annan en kestyon Mr Speaker.

MR SPEAKER

Koze. Onorab Pillay Minis in reponn ou kestyon. Onorab Cosgrow, si ou annan en kestyon poz li la.

HON WALLACE COSGROW

Mersi Mr Speaker. Mr Speaker, mwan mon kestyon i an relasyon avek bann konfizyon ki pe annan.

Minis i dir ki zot in resevwar en sonm larzan atraver *expression of interest* or en *tender* avek en devloper ki anvi devlop Ile Aurore. Apre Minis in osi dir nou poudir i annan bann lezot konblaz, alors sa larzan pou ganny servi pou *offset* depans ki annan pou bann lezot konblaz atraver Providence.

So basically, Minis in osi dir nou ki poudir *EIA* pa ankor konplete, me solman zot in fini anmas larzan avek sa devloper. *EIA* pa ankor konplete, si i arive ki *EIA* i dir ki nou pa ankor kapab fer konblaz, ki zot pou fer avek sa larzan ki'n zot in fini anmase avek sa devloper Mr Speaker?

E eski Minis i kapab dir nou konbyen zot in anmase avek sa devloper e kan sa bann konblaz pou demare? Akoz bann investiser ki'n fer *meeting* avek i ankor pe espere pou konnen kan egzaktman pou demare e pou konplete. Mersi bokou.

MR SPEAKER

Mersi. Minis, ou klarifikasyon?

MINISTER DEVIKA VIDOT

Mersi Mr Speaker. Mr Speaker, Gouvernman pa

ankor resevwar larzan avek lenvestiser. Me byensir nou bezwen fer prozeksyon dan Bidze *ok*, nou bezwen fer prozeksyon dan Bidze.

Sa ki nou kapab konfirmen se ki dan *Consolidated Funds* nou pa ankor resevwar sa larzan. Me Mr Speaker, mon ganny en konpran poudir sa bann kalite proze petet i en pe konplike pou zot ganny en konpran. Mon konpran sa, napa problem.

Me selman petet zot en pti pe agrese osi. Parske bomaten mon ti pe ekout zot dan *PNQ* e keksoz pa'n tro al dan zot faver. So mon konpran.

HON SEBASTIEN PILLAY

PNQ in ale dan nou faver, *PNQ* in al dan nou faver zot pe vol pei, zot pe vol Seselwa zot. La larzan ou pa konnen konbyen ou'n gannyen.

MR SPEAKER

Order! Minis annou pa al dan *PNQ* annou zis fini avek sa kestyon. Ou'n terminen Minis? Byen. *Ok* nou ava avans lo kestyon, nou'n fini avek bann kestyon an ekrir ki ti'n soumet.

Nou annan 2 *Questions Without Notice*. Kestyon San Notis. Nou a poz premye dan non Onorab Richard Labrosse.

HON RICHARD LABROSSE

Mersi Mr Speaker. Dabor mon ti a kontan dir Minis bonzour avek ou delegasyon. Bonzour tou dimoun ki a lekout; Kestyon *Without Notice* i lir *comme* swivan; -

Eski Minis i kapab enform Lasanble si son Minister in travay lo okenn nouvo prosedir ouswa Polisi ki donn bann nouvo Biznesmenn Seselwa sirtou bann zenn sans montre e vann zot prodwi dan bann Laboutik *Camion Hall*? Mersi Mr Speaker.

MR SPEAKER

Mersi Onorab. Minis, ou repons.

MINISTER DEVIKA VIDOT

Mersi Mr Speaker. Onorab mon konpran ou lentere ki ou atase avek bann zenn antreprenner e mon vreman apresye sa mwan osi kot Minister e kot *ESA* nou annan maksimonm lentere pou zot.

Pou le moman tou lespas i okipe anba bann kad legal e pou le moman nou napa nouvo lespas pou *accommodate* biznes an gran. Kot i konsern lo laspe vann prodwi mon konnen poudir fer prodwi ariv lo marse i reste en defi pou en kantite biznes.

Me parey mon'n fer resorti dernyen fwa letan mon ti reponn sa kestyon i annan en travay ki Gouvernman pe

fer e kot nou pe fer en kantite konsiltasyon. Me sa pa ankor terminen.

Antretan *ESA* i annan en laboutik ki i toultan kapab akeyir bann prodwi ki sorti kot bann dimoun e *ESA* i aplik osi pou bann zenn. E la mon lans en lapel avek tou bann biznes, nou kontinyelman ankouraz zot, me mon a fer li ankor.

Sirtou bann ki tonm anba lamenzman Gouvernman parey *Camion Hall*. I enportan ki nou siport nou bann zwenn e ede ki nou kapab fer li posibil pou zot ganny en sans pou zot met zot prodwi lo *display* e ganny posibilite pou vann. Mersi bokou.

MR SPEAKER

Mersi. Onorab, ou annan siplemanter?

HON RICHARD LABROSSE

Mersi Mr Speaker. Mersi Minis pou ou larepons. Minis ou'n-dan ou larepons ki ou'n-donner ou'n dir ki sa bann biznes ki la, *ok* ou'n fer nou konpran ki zot napa lespas. E sa bann biznes ki la zot la lo en kad legal.

So nou konnen ki *Camion Hall* li menm ozordi zour nou annan en ta gro biznes ki pe fer sitan byen profi. E nou konnen ki sa landrwa li menm i en landrwa

ki ganny sibvansyon par Gouvernman.

So la mon ti ava kontan konnen Minis, eski ki annan okenn plan ki zot pe fer ek sa bann biznes sirtou letan nou pe koz bann gro biznes ki'n deza annan en non dan Sesel ozordi, ki zot annan en plan siksede pou zot sorti?

Mon dezyenm kestyon Minis, ki mon ti a kontan demande si ESA oubyen Minister ki ou ladan ozordi, zot pe mazin osi pou revwar en pe pou fer en, pou agrandi en pe sa landrwa li menm, ki nou vwar li osi ki i ankor annan en pe lespas? Mersi.

MR SPEAKER

Mersi Onorab. Minis?

MINISTER DEVIKA VIDOT

Mersi Mr Speaker. Mersi Onorab. An relasyon avek travay ki nou pe fer, byensir nou pe kolekte tou lenformasyon e nou pe fer bokou konsiltasyon avek bann lezot lazans ensi byen ki avek ed sa bann *tenants*. E sa pou ed nou pou nou kapab sorti avek en *framework*, pou marse pou tou dimoun.

An relasyon avek, wi, *sorry*, plan pou agrandi *Camion Hall*. I annan en diskisyon ki'n deza komanse, me pour le moman napa okenn plan konkret ki nou'n met ater. Mon krwar i annan

bokou potansyel mon dakor avek ou, ki annan bokou potansyel pou nou grandi lespas.

E mon krwar nou a kapab fer en keksoz en pe menm parey fer li en pe lo en pli gran lanplèr osi, kot i ava pa selman siport nou bann biznes me osi ofer plis aktivite pou bann touris e bann viziter letan zot vin Viktorya. Mersi.

MR SPEAKER

Mersi Minis. Bon, kestyon in deza ganny leve lo si mon pou permet lezot siplemanter lo Kestyon *Without Notice*. I annan en bon rezon pou tret Kestyon *Without Notice* diferan avek bann kestyon ki'n ganny soumet.

Akoz si Kestyon *Without Notice* i vini e i ganny menm tretman, sa i pou ankouraz bann Manm pou zot pa met zot kestyon, pa anvoy zot kestyon, zot zis espere e lo dernyen moman zot a dir zot a met zot Kestyon *Without Notice*.

So amwen ki en Kestyon *Without Notice* i annan en sans irzan ki i annan en rezon aköz in ganny mete lo dernyen moman, mon pou kontinyen tret *Question Without Notice* diferan avek bann kestyon ki'n ganny soumet.

Alor pou le moman mon pa pe pran kestyon siplemanter lo la. Donk, mon

ava avans lo kestyon limero 2, Onorab Cosgrow.

HON WALLACE COSGROW

Mersi Mr Speaker. Mr Speaker, mon asir ou, mon asir Lasanble, mon asir Minis ki sa Kestyon *Without Notice* i annan tou irzans. Sanmenm mon'n met li lo- mon'n demande pou li antre lo *Order Paper* ozordi.

So mon kestyon Mr Speaker, i lir koumsa; -

Eski Minis i kapab eksplik Lasanble akoz ki in annan anviron 30 travayer sa Minister ki'n kite pandan sa dernyen 4 an? E ki lenpak sa in annan lo lefikasite sa Minister? E mon pe koz lo portfolyo Minister. Mersi.

MR SPEAKER

Minis, ou repons.

MINISTER DEVIKA VIDOT

Mersi Mr Speaker. Onorab, parey dan nenport ki landrwa travay *staff*- i annan mouvman *staff*. *Staff* i vini e i annan *staff* i ale e sa i ariv pou plizyer rezon.

Serten i decide pou ale pour ki zot kapab rod en pli bon saler. Serten i ale akoz zot anvi en progresyon dan zot karyer, ouswa i annan menm bann ki ale lo rezon personnel. Dan ka Minister rezon prensipal ki *staff* i site dan prosedir letan zot pe ale, se

akoz zot al rod pli bon loportinite ouswa zot rod progresyon dan karyer.

Dan bokou lenstans *staff* i prefere al dan en *post* ki annan mwens louvraz, me pli o lapey. Ouswa dan serten lenstans e sa i aplik sirtou ban zenn e nou'n remark sa, zot retourn dan en *post* ki pli ale avek letid ki zot in fer. Nou osi annan detrwa *staff* ki'n kit pei pou bann rezon personnel.

Mr Speaker, nou touzour sagren letan nou perdi en manm nou tim. Me nou respe e rekonnèt zot bann bezwen. Nou ti a kontan profit sa lokazyon pou nou remersye tou bann *staff* ki'n travay avek Minister e ki'n kontribye dan en fason ou en lot, pou ede anmenn nou lorganizasyon pli devan.

Mon ti ava osi profite pou remersye bann travayer Minister ki pe kontiny sa lalit avek nou, pou anmenn en vre diferans dan nou pei. Malgre tou defi zot kontinyen travay dir e zot donn zot mye pou nou kapab anmenn nou pei pli devan.

An relasyon avek lefikasite Onorab, parey dan nenport ki sityasyon pli ou annan resours i pli bon, me parfwa annan plis resours i pa vedir ki pou vin pli efikas. I pa en sekre ki lapey dan Gouvernman i pli ba ki sekter prive. E sa i poz en *challenge*

pou pa zis nou Minister me pou Gouvernman an antye.

E letan en nouvo Minister avek en nouvo fason fer, avek en kad saler ki pa vreman konpetitiv, i difisil pou atir bann dimoun avek konpetans dan sa ki nou pe rode. Nou Minister i osi enn ki vreman teknik e alor i en pe difisil pou nou kapab ganny bann dimoun avek bann konpetans nesesser. Nou tim i vreman pti, me sa pa anpes nou delivre. E mwan mon vreman, vreman fyer de zot.

Malerezman re aranz nou *Scheme* pa en keksoz ki pou vin fasil, an vi kontrent Bidze. E byensir parey ou konn byen Onorab groser servis piblik i en konsern mazer pou Minister Finans e osi *PSB* ki ansarz *recruitment* e ki ansarz *civil service*.

Mon espekte Onorab ki mon'n kapab reponn ou kestyon. Mersi.

MR SPEAKER

Ou an en siplemanter Onorab Cosgrow?

HON WALLACE COSGROW

Yes Mr Speaker. Mersi Mr Speaker. Mr Speaker, an mezir nou pe koze la mon'n kont 34, 34 *staff* dan portfolyo anba portfolyo Minis ki pandan sa dernyen 4 an in swa kite, swa kontra pa'n renouvle.

E ladan mon pe koz 2 *CEO*, 2 *Deputy CEO*, 1 *PS*, 1 *DG* avek detrwa *Principal*. En *whole* Departman *DSTI* kot ti fer bann zafer *innovation technology* Mr Speaker, tousala in ale. E mon demann mon lekor ki mannyer sa Minister i kapab delivre?

E se sa ki mon'n anmenn sa kestyon. E mon enkyet ki bann keksoz ki ganny met devan. E la dayer nou war i annan *delay* dan *recruitment* pou sa Minister. Mon demann mon lekor ki mannyer zot kapab pous devan sa bann azanda sa Minister?

Boner mon'n fer le pwen mon'n demann en kestyon konsernan bann *district projects* kot nou met- pou met bann *micro enterprise*. Napa naryen ki'n ganny fer pandan sa dernyen 4 an. So pou mwan *it goes to the* lefikasite sa Minister.

So eski Minis i kapab sa Minister e sa portfolyo. Eski Minis i kapab donn Lasanble e pep Seselwa, biznesmenn, bann pti mikro antrepriz ki son Minister pe travay pou rektifye e anmas sa bann *post* e fer ki i annan dimoun kapab, kalib e konpetan pou kapab delivre pou nou kominote biznes, sirtou *micro and small enterprises*? Mersi bokou Mr Speaker.

MR SPEAKER

Mersi. Minis in deza adres size lefikasite. Minis, eski ou annan okenn keksoz pou azoute lo la?

(Interruptions)

MINISTER DEVIKA VIDOT

Mersi Mr Speaker. Mr Speaker, mon kontan ki se Onorab Cosgrow ki'n demann mon sa kestyon akoz *once upon a time* i ti pe okip sa pozisyon.

E mon demann mwan kwa ki li in fer, parske letan mwan mon'n antre...

(**APPLAUSE**)

MINISTER DEVIKA VIDOT

.. stratezi lantreprenarya ti napa. Nou'n bezwen fer. Stratezi lenvestisman ti napa, nou'n fer, nou'n met ater. Ozordi zour i annan en map lenvestisman ki dir ki sekter priyoriter e kote resours pei i bezwen ale pou nou kapab tir lenvestisman. Ou pa ti enterese ek sa.

Revwar lenvestisman bann Lalwa Lenvestisman. Lotrozour mon ti vin avek Lalwa *Licensing Authority* ou ti dir nou pares, be ou, ou ti la ou pa'n fer naryen lo la. Wi, ou ti dir poudir nou *staff* i pares. Wi. Nou *staff* pa bliye sa ki ou'n dir, nou *staff* pa bliye.

E alors i annan en kantite keksoz ki si pa ti tonm-ou konnen ki mon ti fer letan mon ti antre dan Minister?

MR SPEAKER

Order!

MINISTER DEVIKA VIDOT

Mon ti krwar poudir *Licensing Authority* pa pe ganny ase latansyon e mon ti pouse pou Minister Finans kapab donn mwan sa anba mon portfolyo, pou mwan kapab siporte. Ou ti kapab fer sa ou osi, ou pa'n fer.

Policy Industrial nou'n met ater, ou pa'n fer. Mon'n bezwen regard striktir antye. Sa *Unit Monitoring and Evaluation*, mon demann mon ki mannyer Gouvernman ti fer desizyon zot napa en striktir, ki kapab fer swivi, evalye Polisi ki pe ganny fer. Ti la selman pa ti pe marse.

Mon demann *staff* konbyen fwa ou ti zwenn ek Minis? On dire 1 fwa a 2 fwa dan lannen. Mr Speaker, mwan mon pa en Minis Seremonyal. Mwan mon asiz avek mon tim e mon travay. Si nou bezwen fer *brainstorming* nou fer *brainstorming*. Mon pa zis donn direktiv, e pa siporte.

E petet, petet i annan dimoun ki pa santi li konfortab avek lafason ki keksoz pe bouze. Petet, petet i annan dimoun ki zot pa war i annan sans irzans pou zot travay e delivre. Me nou pa

kapab kontinyen koumsa. Pa akoz avan zot ti dan *slow motion* ki la nou bezwen reste dan *slow motion*.

So se sa sanzman ki mon'n anmennen. Mersi bokou.

(Interruptions)

MR SPEAKER

Bon, *Order!* Bon, mersi. *Order!* Mersi Minis pou ou repons. *Order!* Nou termin la avek sesyon kestyon. Mon envit...

(Interruptions)

MR SPEAKER

Order! Mon envit Minis e son bann zofisye pou fer zot depar. Zis pou nou kapab fer en pti lanons. Mersi Minis. Bonn kontinyasyon.

(APPLAUSE)

MR SPEAKER

Byen. Bon parey bann Manm i konnen, *Question Time* ti nou sel biznes lo *Order Paper* pou sa semenn. Nou napa Mosyon e nou napa *Bill* pou le moman. So nou ava termin Lasanble la pou sa semenn.

Me selman zis pou asir piblik, nou annan keksoz pou fer, demen nou pou annan en Delegasyon Viziter Diplomat Lezislater sorti Lasin. E nou pou annan en programm avek zot. E mon a osi rapel

Business, Assembly Business Committee ki nou pou annan *meeting* e Madanm Clerk i ava enform zot lo ler ki nou pou fer sa.

Donk, mon remersye bann Manm pou zot partisipasyon. Lasanble i ava *adjourn* e nou a rebran 9 er Mardi prosen.

(ADJOURNMENT)